

BAWKNAE (Leviticus)

Hmaisawi thuengnae

¹ BAWIPA ni Mosi a kaw teh kamkhuengnae lukkareiim dawk hoi a pato.

² Nang ni Isarel miphunnaw koe na dei pouh hane lawk teh, nangmouh thung dawk tami buetbuet touh ni BAWIPA koe hno poe hanelah ngai pawiteh, saring, tu, hmae hoi maito a sin han.

³ Maito hah hmaisawi thuengnae lah a sak han ngai pawiteh, kacueme a na tongpa na thokhai vaiteh, Cathut lungyouk nahanlah kamkhuengnae lukkareiim takhang koe na poe han.

⁴ Thueng e maito lû dawk amae kut a toung vaiteh, ahnie yontha nahanlah a dâw han.

⁵ BAWIPA hmalah hote maito a thei awh hnukkhu, Aron e capanaw ni a thi hah a sin awh vaiteh, kamkhuengnae lukkareiim takhang teng sathei thuengnae khuongroe van petkâtue lah thi a kahei han.

⁶ Thuengnae ka sak e tami ni saring e pho a hlip vaiteh, thoukthouk a tâtueng han.

⁷ Aron e capa vaihmanaw ni sathei thuengnae khuongroe van, thing a paruen hnukkhu hmai a patawi vaiteh,

⁸ Thing van vah a lû, athaw hoi a takpatinaw na ta han.

⁹ A khok hoi a ruenthinnaw hah tui hoi hmaloe na pâsu han. Vaihma ni hote sathei abuemlahoi

khoungroe van hmai hoi a sawi han. Hetteh, hmai hoi sathei thuengnae doeh. BAWIPA koe hmuitui hanlah hmai hoi thuengnae lah ao.

¹⁰ Tu, hmae hah hmaisawi thuengnae lah sak han na ngai pawiteh, kacueme a na tongpa na thokhai vaiteh,

¹¹ BAWIPA hmalah khoungroe atunglah na thei hnukkhu, Aron e capa, vahmanaw ni a thi hah khoungroe petkâtue lah a kahei han.

¹² Thuengnae ka sak e tami ni thoukthouk a tâtueng han. A lû hoi a moi hah a pâkhueng vaiteh vahma ni khoungroe van e thing van a ta han.

¹³ A khok hoi a ruenthinnaw hah tui hoi hmaloe a pâsu han. Vahma ni abuemlahoi a sin vaiteh khoungroe van hmai a sawi han. Hetteh, BAWIPA koe hmaisawi hmuitui thuengnae lah ao.

¹⁴ BAWIPA koe tava hoi hmaisawi thuengnae sak hanlah na ngai pawiteh, bakhu thoseh, âbakhu thoseh, na thokhai vaiteh na poe han.

¹⁵ Vahma ni khoungroe koe a thokhai hnukkhu, a lahuen a kapen vaiteh khoungroe van hmai a sawi han. A thi teh khoungroe teng a pacâ han.

¹⁶ A yoncapo hoi a cuekcaduen dawk e raw-canaw hah na la hnukkhu hraba tanae hmuen, khoungroe hmalah a tâkhawng han.

¹⁷ A rathei khuehoi tava a sei vaiteh vahma ni khoungroe van e thing van hmai a sawi han. Hetteh, BAWIPA koe hmaisawi hmuitui thuengnae lah ao.

2*Tavai thuengnae*

¹ BAWIPA koe tavai hoi thuengnae sak hanlah na ngai pawiteh, tavai kaneng e na sin han. Tavai e avan satui na awi vaiteh, frankinsen hai na thum han.

² Aron e capa, vahma koe na sin vaiteh, vahma ni tavai kut karum buet touh, satui youn touh, frankinsen kaawm e pueng a la vaiteh, khoungroe van hmaisawi awh han. Hetteh, BAWIPA koe hmaisawi hmuitui thuengnae doeh.

³ Kacawie tavainaw teh Aron hoi a capanaw hanelah ao han. BAWIPA koe hmai hoi thuengnae thung dawk kathoungpoung lah ao.

⁴ Hmai pâeng e vaiyei hoi thuengnae sak hanlah na ngai pawiteh, satui, tonphuenhoehe phen thoseh, satui hluk e vaiteh kamrâw tonphuenhoehe hai thoseh, thuengnae lah na sak awh han.

⁵ Ukkang dawk karê e vaiyei thuengnae lah sak han na ngai pawiteh, satui hoi kalawt teh tonphuenhoehe tavai hoi na sak han.

⁶ Hote vaiyei na raen vaiteh, satui na awi han. Tavai hoi thuengnae sak e doeh.

⁷ Ukkang dawk karê e vaiyei hoi thuengnae sak han na ngai pawiteh, satui hoi kalawt e tavai hoi na sak han.

⁸ Hote tavai hoi thuengnae sak e naw pueng, BAWIPA koe a thokhai vaiteh vahma koe a poe hnukkhu ahni ni khoungroe koe a thokhai han.

⁹ Tavai hoi thuengnae dawk e a pham thai tawk a pham vaiteh khoungroe van hmai a sawi

han. Hetteh, BAWIPA koe hmaisawi hmuitui thuengnae lah ao.

¹⁰ Kacawie tavai teh Aron hoi a capanaw hanelah ao han. BAWIPA koe thuengnae thung dawk kathoungpoung hno lah ao.

¹¹ BAWIPA koe poe e tavai hoi thuengnae dawk ton phuen mahoeh. BAWIPA koe hmai hoi thuengnae na sak navah, ton hmai na sawi mahoeh. Khoitui hai hmai na sawi mahoeh.

¹² Aluepaw thuengnae dawk ton hoi khoitui hah BAWIPA koe poe thai ei nakunghai, hmuitui hanelah khuungroe dawk teh hmai na sawi mahoeh.

¹³ Tavai hoi thuengnae pueng dawk palawi na phuen han. Na sak e thuengnae dawk, BAWIPA e lawkkam palawi na phuen roeroe han.

¹⁴ Cavui aluepaw, BAWIPA koe thuengnae sak hanlah na ngai pawiteh, cavui hah hmai na pahai lahoi na kamkim sak vaiteh na kanawi hnukkhu,

¹⁵ Satui na awi vaiteh, frankinsen hai na thum han. Hetteh, BAWIPA koe tavai hoi thuengnae lah ao.

¹⁶ Na kanawi tangcoung e cakang youn touh, satui youn touh, frankinsen kaawm e puenghoi vaihma ni hmaisawi han. Hetteh, BAWIPA koe hmaisawi thuengnae lah ao.

3

Roumnae thuengnae

¹ Maito hoi roum thuengnae sak hanlah na ngai pawiteh, kacueme atan nakunghai ala

nakunghai buetbuet touh BAWIPA koe na sin han.

² Maito lû van amae kut a toun vaiteh, kamkhuengnae lukkareiim takhang teng a thei hnukkhu, Aron e capa vahmanaw ni khuungroe petkâtue lah a thi a kahei awh han.

³ A ruen ka ramuk e athaw, a ruen hoi kâkuen e athaw, patuen dawk kaawm e kuen kahni touh dawk e athaw,

⁴ kuen hoi cungtalah thin van kaawm e maimaranaw hah, roum thuengnae sathei thung e la vaiteh, BAWIPA koe hmai hoi thueng hanelah poe hnukkhu,

⁵ Aron e a capanaw ni khuungroe van ta e sathei hoi cungtalah hmai a sawi a han. Hetteh, BAWIPA koe hmuitui hmaisawi thuengnae lah ao.

⁶ BAWIPA koe tu hoi hmae hah roum thuengnae sak han na ngai pawiteh, toun kaawm hoeh e atan nakunghai ala nakunghai buetbuet touh na sin han.

⁷ Tuca thuengnae lah sak han na ngai pawiteh BAWIPA hmalah na poe hnukkhu,

⁸ Tu e a lû van amae kut a toun vaiteh kamkhuengnae lukkareiim hmalah a thei hnukkhu, Aron e capanaw ni thuengnae khuungroe van a thi petkâtue lah a kahei han.

⁹ Atak dawk e athaw, a kenghru tâtueng e, a moi abuemlah, a ruen ka ramuk e athaw, a ruen dawk e athaw,

¹⁰ Patuen dawk kaawm e kuen kahni touh dawk e athaw, kuen hoi thin dawk e maimaranaw, roumnae sathei dawk e na la vaiteh BAWIPA koe thuengnae na sak hnukkhu,

¹¹ Vaihma ni khuungroe van hmai a sawi han. BAWIPA koe hmaisawi thuengnae sak e rawca katuilah ao.

¹² Hmae hoi thuengnae sak han na ngai pawiteh BAWIPA hmalah a thokhai han.

¹³ Hmae lû dawk a kut toung vaiteh kamkhuengnae lukkareiim hmalah a thei hnukkhu, Aron e capanaw ni khuungroe petkâtue lah a thi hah a kahei han.

¹⁴ A ruen ka ramuk e athaw, a ruen dawk e athaw,

¹⁵ Patuen dawk kaawm e kuen kahni touh hoi cungtalah athin dawk e maimaranaw, ama ni thuengnae dawk e a la vaiteh, BAWIPA koe hmaisawi thuengnae sak hanlah a poe hnukkhu,

¹⁶ Vaihma ni khuungroe van hmai a sawi han. Hmuitui hanlah hmaisawi thuengnae lah ao. Athaw kaawm e pueng teh BAWIPA e lah doe hao.

¹⁷ Na miphun catounnaw ni ao na tangkuem koe a thaw hoi a thi hah cat mahoeh telah yungyoe e kâpoe e lah ao telah atipouh.

4

Yon thuengnae

¹ BAWIPA ni Mosi koe, nang ni na miphunnaw koe patuen bout na dei pouh hane teh,

² Phunglawnk panuek awh hoeh, kâlawnk a tapoe teh a sak hoeh hane kawi sakpayon pawiteh,

³ Satui awi e vaihma ni yon sak hanlah taminaw a tacuek teh ama hai yon pawiteh,

hote yontha nahanelah yon ka tawn hoeh e maitotanca hah

⁴ Rangpui kamkhuengnae lukkareiim takhang teng, BAWIPA hmalah a thokhai vaiteh BAWIPA koe a poe han. Hahoi, maito lû dawk a kut toungha vaiteh BAWIPA hmalah maito a thei han.

⁵ Satui awi e vaihma ni maito thi a la vaiteh kamkhuengnae lukkareiim koe a sin hnukkhu,

⁶ Amae kuttawn hah thi dawk a ranup vaiteh, kathoung hmuem, lukkarei yap e hmalah, BAWIPA hmalah vai sari touh a kahei han.

⁷ Vaihma ni kamkhuengnae lukkareiim thung BAWIPA hmalah kaawm e hmuitui thuengnae khuungroe naw dawk maito thi a hluk vaiteh, kacawie a thi hah kamkhuengnae lukkareiim takhang hmalah kaawm e hmaisawinae khuungroe kung koe a rabawk han.

⁸ Roum thuengnae sathei dawk e maito thaw la e patetlah kâmai hawi nahanelah sak e maito ruen ka ramuk e athaw, a ruen dawk kaawm e athaw,

⁹ Patuen dawk kaawm e kuen kahni touh hoi thin dawk e maimara, athaw kaawm e pueng a la vaiteh,

¹⁰ Thuengnae khuungroe van hmai a sawi han.

¹¹ Maito e a lû, a khok, a ruen, a ruen kanem hoi a vuen, a moi kaawm e pueng,

¹² Maito buem hah lukkareiim alawilah hraba rabawknae hmuem kathoung koe a ceikhai vaiteh thing van hmai a sawi han. Hraba rabawknae hmuem koe hmai a sawi han.

¹³ Isarel miphun abuemlah ni, phunglawk panuek laipalah sak kawi hoeh e yon hoi kâlawk a tapoe teh yon sakpayon pawiteh,

¹⁴ Hottelah, a sak payonnae yon a kâpanue torei teh, hote yon hanlah tamimaya ni a kum kanaw e maitotan hah, kamkhuengnae lukkareiim hmalah a thokhai han.

¹⁵ Rangpui thung dawk a kum kacuenaw ni BAWIPA hmalah maito lû van kut toun vaiteh a thei han.

¹⁶ Satui awi e vaihma ni kamkhuengnae lukkareiim koe maito thi a sin hnukkhu,

¹⁷ A kudawn hah thi dawk a ranup vaiteh BAWIPA koe lukkarei yap e hmalah vai sari touh a kahei han.

¹⁸ Vaihma ni kamkhuengnae lukkareiim thung, BAWIPA hmalah kaawm e thuengnae khoun-groekinaw dawk thi a hlun vaiteh kacawie thi teh, kamkhuengnae lukkareiim takhang hmalah kaawm e hmaisawi thuengnae khoungroe kung koe a rabawk han.

¹⁹ Maito thaw pueng a la vaiteh khoungroe van hmai a sawi han.

²⁰ Yontha nahanlah maito hoi thuengnae sak e patetlah vaihma ni taminaw hanelah yonthanae sak pawiteh, ahnimae yontha lah ao han.

²¹ Hathnukkhu hoi maito hah rim alawilah a hrawi aw h vaiteh, apasueke maito hmaisawi e patetlah hmai a sawi aw h han. Hethateh, taminaw yontha nahanlah thuengnae sak e doeh.

²² Ukkung ni hai phunglawk panuek laipalah, BAWIPA e kâlawk a tapoe teh sak hoeh hane kawi yon, sakpayon pawiteh,

²³ Ama ni a sakpayon e yon a kâpanue torei teh, kacueme hmaetanca thueng nahanelah a thokhai han.

24 Hmae lû van amae kut a toungh vaiteh, BAWIPA hmalah, hmaisawinae, sathei theinae hmuen koe a thei han. Hethateh, yontha nahanlah sak e thuengnae doeh.

25 Vaihma ni yonthanae sathei thi hah, kutdawn hoi a la vaiteh, hmaisawi thuengnae khuungroe kinaw dawk a hlun hnukkhu, kacawie thi hah, khuungroe kung koe na rabawk han.

26 Roum thuengnae sathei thaw sak e patetlah athaw pueng, khuungroe van hmai a sawi han. Hot patetlah vaihma ni ukkung e yontha nahanlah sak pawiteh, yontha lah ao han.

27 Mathoe buethuet touh ni phunglawk panuek laipalah BAWIPA e kâlawk a tapoe teh sak kawi hoeh e yon sak pawiteh,

28 Ama ni a sak e yon a kâpanue torei teh, hote yon hanelah, kacueme hmaelaca a thokhai han.

29 Kâmaiawinae sathei, Hmae lû van, amae kut a toungh vaiteh, hmaisawinae sathei theinae hmuen koe hote hmae a thei han.

30 Vaihma ni a kutdawn hoi a thi a sin vaiteh khuungroe kinaw dawk a hlun hnukkhu, kacawie hah, khuungroe kung koe a rabawk han.

31 Roum thuengnae sathei thaw la e patetlah athaw kaawm pueng a la vaiteh, BAWIPA koe hmuitui hanlah khuungroe van hmai a sawi han. Hottelah, vaihma ni hote tami hanlah yonthanae sak pouh pawiteh, a yontha lah ao han.

32 Tuca hoi yonthanae sak hanlah na ngai pawiteh kacueme napui na thokhai han.

33 Kâmaiawinae sathei tu lû van amae kut a toungh vaiteh, hmaisawinae sathei theinae

hmuen koe a thei han.

³⁴ Vaihma ni hote sathei thi a kutdawn hoi a la vaiteh, hmaisawi thuengnae khuungroe kinaw dawk a hlun hnukkhu, a kahei vaiteh, kacawie thi hah khuungroe kung koe a rabawk han.

³⁵ Roumnae thuengnae tuca thaw sak e patetlah athaw kaawm pueng la vaiteh, BAWIPA koe hmaisawi thuengnae hoi cungtalah, khuungroe van hmai a sawi han. Hottelah, vaihma ni hote tami a sakpayon e yon hanlah yonthanae a sak pouh pawiteh a yontha lah ao han.

5

¹ Tami buetbuet touh ni a hmu e hoi a panue e hno dawk, kapanuekkhaikung lah ao teh, a pathang e thoebonae a thai nahlangva, dei laipalah awm pawiteh, yonpennae teh ama ni a khang han.

² Tami buetbuet touh ni kathounghoehe sarang, saring, vonpui hoi kâva e saring kathoung hoeh e kadout e ro tek pawiteh yonpen lah ao han.

³ Hot hnukkhu hoi, tami hanelah kathounghoehe, kakhin e lah kaawm e hno, a kâbet payon e hah bout a panue torei teh yon pen lah ao han.

⁴ Tami buetbuet touh ni kahawi hno thoseh, kathout hno thoseh, sut pouk laipalah lawkkamnae a sak teh, thoe a bo. Hote lawkkamnae bout a kâpanue torei teh, yon pen lah ao han.

⁵ Hetpatete yonpennae buet buet touh ao torei teh, Bangpatete nakunghai ama ni yonpâpho naseh.

⁶ A sakpayon e yontha nahanlah tu thoseh, hmae thoseh, a napui ca buetbuet touh yon thueng nahanelah, Cathut koe a thokhai hnukkhu, vaihma ni hote tami hanelah yon thuengnae a sak pouh han.

⁷ Tuca tawn hoehpawiteh, a sak payonnae yontha nahanlah sathei buet touh hmai thueng nahanlah buet touh, bakhu kahni touh, hoeh pawiteh âbakhu kahni touh BAWIPA koe vahma hmalah a thokhai han.

⁸ Vaihma ni yonthanae sathei hah hmaloe thuengnae a sak han. A lahuen a kafen vaiteh, a tâtueng han. A tak teh na sei mahoeh.

⁹ Hote yon thuengnae sathei thi hah, khoun-groe tapang dawk a kahei vaiteh, kacawie a thi teh, khoungroe kung koe a pacá han. Hethateh, yon thuengnae doeh.

¹⁰ Apâhni e tava teh a lamthung patetlah hmai thuengnae patetlah thuengnae a sak han. Hottelah, Vaihma ni ahnie a sakpayon e yon hanlah yonthanae a sak pouh pawiteh, ahnie yon teh tha lah ao han.

¹¹ Bakhu kahni touh thoseh, âbakhu kahni touh thoseh, buetbuet touh coung thai hoehpawiteh, yon ka sak e tami ni yon thuengnae sathei yueng lah tavai ephah pung hra pung touh a thokhai han. Yon thuengnae lah ao dawkah satui hoi frankinsen na awi mahoeh.

¹² Vaihma koe na thokhai hnukkhu, vahma ni tavai vai touh kasum a la vaiteh, BAWIPA koe hmai thuengnae hoi cungtalah khoungroe van hmai a sawi han. Hethateh, yon thuengnae lah ao.

¹³ Hottelah, vahma ni hote tami ni a sakpayon

e yon hanelah yon thuengnae sak pawiteh ahnie yontha lah ao han. Kacawie teh tavai thuengnae patetlah vaihma hanelah ao han telah Mosi koe atipouh.

Kâtapoe thuengnae

¹⁴ BAWIPA ni Mosi koe bout a dei pouh e teh,

¹⁵ Tami buetbuet touh ni phunglawk panuek laipalah BAWIPA hoi kâkuen e hno dawk payon pawiteh, hote payonnae hanlah yonthanae sathei tie tutan hmuen kathoung koe e patetlah ngun tangka a to vaiteh, BAWIPA koe a thokhai han.

¹⁶ Hottelah, BAWIPA hoi kâkuen e hno dawk, a sakpayon e hanlah, panga touh dawk buet touh a thapsin vaiteh, vaihma koe a poe han. Vaihma ni hai yonthanae sathei lah kaawm e tu hoi hote tami hanelah yonthanae sak pouh pawiteh, ahnie yon teh tha lah ao han.

¹⁷ Tami buetbuet touh ni BAWIPA ni kâ a poe e sakpayon pawiteh, a sak payonnae ama ni a panue hoeh nakunghai a sak hno teh ama ni a khang han.

¹⁸ Yonnae ngaithoum nahanelah, kacueme tutan, vaihma koe a thokhai han. Phunglawk panuek laipalah, a sakpayon nakunghai, amahoima yonnae kâpanuek hoeh e tami hanelah vaihma ni yonthanae sak pouh pawiteh, ahnie yon teh tha lah ao han.

¹⁹ Hettelah, BAWIPA ka taran niteh, kâ kaek katang e kâtapoe thuengnae doeh telah ati.

6

¹ BAWIPA ni Mosi koe bout a dei e teh,

² Tami buetbuet touh ni a imri ni hnopai a kuem sak e dawk laithoe dei nakunghai thoseh, ayâ e hnopai a lawp nakunghai thoseh, laithoe a dei teh a imri a dum nakunghai thoseh,

³ Kahmat e hno a hmu navah laithoe a dei teh thoe ka bo nakunghai thoseh, hot patet lae yonnae buetbuet touh a sak teh BAWIPA koe sakpayon pawiteh,

⁴ Hote tami teh a yon kecu dawkvah, a lawphno ayâ dum laihoi a hmu e hnopai, ayâ ni a kuem sak e hnopai, a pâphawng e hnopai,

⁵ Kahmanhoeh lahoi thoe a kâbo e hnopai phu, a hmu e a phu hoi cungtalah, yon thuengnae hnin dawkvah katawnkung koe panga touh dawk pung touh, bout a poe sin han.

⁶ Yonnae a sak e dawk thueng nahanelah, kacueme tutan hah BAWIPA koe, vaihma hmalah a thokhai han.

⁷ Vaihma ni hote tami hanelah, BAWIPA koe yonthanae sak pouh pawiteh, ahnie yonnae pueng teh ngaithoum lah ao han atipouh.

⁸ BAWIPA ni Mosi koe bout a dei e teh,

⁹ Nang ni Aron hoi a capanaw koe, na dei pouh hane teh, hmaisawi thuengnae teh, sathei hah khoungroe hmai van karum tuettuet khodai totouh na o sak vaiteh, thuengnae khoungroe hmai teh pou na kamtawi sak han.

¹⁰ Vaihma ni lukkanrei khohna a khohna vaiteh, khoungroe van e hraba a kawn vaiteh, khoungroe teng a ta han.

¹¹ A khohna e bout a kâhleng vaiteh, hote hraba hah alawilah kathounge hmuen koe a sin han.

¹² Thuengnae khuungroe hmai teh dout laipalah pou a kamtawi han. Vaihma ni amom tangkuem hmai a racum vaiteh thing van sathei a hruek han. Hote khuungroe van roum thuengnae sathei hai hmai a sawi han.

¹³ Thuengnae khuungroe hmai teh roum sak laipalah pou kamtawi sak han.

¹⁴ Tavai thuengnae teh Aron e capanaw ni khuungroe hmalah BAWIPA koe a thokhai awh han.

¹⁵ Tavai vai touh kasum, satui youn touh, frankinsen abuemlah a la vaiteh, BAWIPA koe hmuitui hanlah khuungroe van hmai a sawi han.

¹⁶ Kacawie naw teh Aron hoi a capanaw ni kamkhuengnae lukkareiim thung hmuen kathoung koe tonphuenhoehe a ca awh han.

¹⁷ Hote tavai dawk ton phuen vaiteh, vaiyei lah na sak mahoeh. Hmai hoi Kai koe thuengnae sak e thung dawk hote vaiyei hah ahnimouh hanlah kai ni ka poe toe. Yontha thuengnae, kâtapoe thuengnae patetlah kathoungpoung lah ao.

¹⁸ Aron hoi a capanaw pueng ni a ca awh han. Hmai hoi BAWIPA koe thuengnae ka tawk e pueng teh a kamthoung awh han, telah nangmae miphun catounnaw totouh a sak hane kâlawk doeh telah ati.

¹⁹ BAWIPA ni Mosi koe bout a dei pouh e teh,

²⁰ Aron hoi a capanaw ni satui a awinae hnин hoi, a yungyoe e thuengnae lah ao thai nahanlah, tavai ephah pung hra pung touh, amom lah tangawn tangduem lah tangawn BAWIPA koe thuengnae a sak awh han.

²¹ Hote tavai hah satui a awi vaiteh, ukkang

dawk a karê vaiteh, vaiyei lah a sak hnukkhu, a thokhai awh vaiteh, a raen hnukkhu a kanuikapin naw hah BAWIPA koe hmuitui han-lah thuengnae a sak han.

²² Aron e hmuen dawk satui awi lah kaawm e a capa ni hai hote thuengnae a sak han. BAWIPA hanelah a yungyoe e kâlawk lah ao.

²³ Vaihma hanelah tavai thuengnae kaawm pueng hmai koung a sawi han. Khoeroe cat mahoeh telah ati.

²⁴ BAWIPA ni Mosi koe bout a dei pouh e teh,

²⁵ Nang ni Aron hoi a capanaw koe na dei pouh hane teh, yon thuengnae teh hmaisawi thuengnae sathei theinae hmuen koe, yonthanae sathei thei han. Hot teh, kathoungpounge lah ao.

²⁶ yontha nahanolah thuengnae na ka sak pouh e vaihma ni kamkhuengnae lukkareiim thung hmuen kathoung koe a ca han.

²⁷ Hote moi kâbet e pueng teh a thoung. Thi ni a tâcawn sin e khohnanaw hmuen kathoung koe a pâsu han.

²⁸ Hote moi thawngnae talai hlaam rek hem han. Rahum hlaam pawiteh, hma vaiteh tui hoi pâsu han.

²⁹ Vaihma tongpa naw pueng ni a ca awh han.

³⁰ Kathoung poung e lah ao. Yonthanae sathei thi hah hmuen kathoung koe yontha nahanelah, kamkhuengnae lukkareiim thung a sin vaiteh, hote sathei moi hah cat mahoeh. Hmai a sawi han.

7

¹ Kâtapoe thuengnae teh kathoungpounge lah ao.

² Hmai thuengnae sathei, theinae hmuen koe, kâtapoe thuengnae sathei hah thei vaiteh khuungroe van petkâtue lah a thi kahei han.

³ A mai hoi cungtalah a ruen ka ramuk e athaw,

⁴ Kuen kahni touh dawk e athaw, kuen hoi cungtalah athin van kaawm e maimara dawk e athaw pueng na poe han.

⁵ Vaihma ni khuungroe van hmai a sawi vaiteh, Cathut koe hmai hoi thuengnae a sak han. Kâtapoe thuengnae lah ao.

⁶ A moi hai vaihma thung e tongpa pueng ni hmuen kathoung koe a ca awh han. Kathoung poung e lah ao.

⁷ Kâtapoe thuengnae teh yon thuengnae hoi a kâvan teh thuengnae ka sak pouh e vaihma ni a coe han.

⁸ Tami buetbuet touh ni a sak e hmaisawi thuengnae ka sak pouh e vaihma ni sathei e a vuen teh a la han.

⁹ A karênae dawk a karê e tavai thuengnae puenghoi ukkang dawk a karê e pueng teh vaihma ni a coe han.

¹⁰ Satui a awi nakunghai thoseh, a awi hoeh nakunghai thoseh, tavai thuengnae naw pueng Aron e a capanaw pueng ni suetalah a kârei awh han.

¹¹ BAWIPA koe roum thuengnae tie teh,

¹² Lunghawilawkdeinae dâw hanlah, thuengnae na sak pawiteh, lunghawilawkdeinae sathei hoi cungtalah satui kalawt e tonphuenhoehe phen, satui hoi sak e tonphuenhoehe kamrâw, satui kalawt e tavai hoi sak teh karê e vaiyeinaw hah na thueng han.

¹³ Hote vaiyei phen hloilah, roum thuengnae hoi kâseng e lunghawilawkdeinae dâwnae sathei hoi cungtalah tonphuenhoehe hai na thueng han.

¹⁴ Thuengnae pueng dawk e vaiyei buet touh BAWIPA koe thuengnae na sak vaiteh hote vaiyei hah roum thuengnae sathei thi kaheikung vaihma ni a coe han.

¹⁵ Lunghawilawkdeinae lah thueng e roum thuengnae sathei moi hah thueng hnin vah na ca han, amom hanelah bout pek mahoeh.

¹⁶ Hoehpawiteh, lawkkam laihoi thueng nakunghai thoseh, malungpouk thuengnae thoseh, thueng hnin vah sathei moi ca vaiteh kacawie moi hai atangtho bout ca han.

¹⁷ Kacawie a moi hah tawkkahnin hmaisawi han.

¹⁸ Roum thuengnae sathei moi, tawkkahnin vah yitca hai na cat payon pawiteh, a lungyouk hoeh e lah na o han. Thuengnae a sak e dâw pouh mahoeh. Panuetkatho e lah ao han. Ka cat e tami teh yon phu a hmu han.

¹⁹ Kathounghoehe hno hoi kâbet e sathei moi cat mahoeh. Hmaisawi han. Kathounge taminaw ni dueng hote sathei moi a ca awh han.

²⁰ Apihai thoseh, kathounghoehe yon a tawn nahlangva, Cathut hoi kâseng e roum thuengnae sathei moi ka cat e tami teh, a miphun dawk hoi takhoe lah ao han.

²¹ Apihai thoseh, tami dawk thoung hoeh e hno, kathounghoehe moi, kathounghoehe pâri patet e hno buetbuet touh a kânep laihoi BAWIPA hoi kâkuen e roum thuengnae sathei moi cat

pawiteh, hote tami teh a miphun dawk hoi takhoe lah ao han telah ati.

²² BAWIPA NI Mosi koe bout a dei pouh e teh,

²³ Maito thoseh, Tu thoseh, hmae thoseh, athaw na cat a mahoe.

²⁴ Amahmawk kadout e saring e athaw hoi sarang ni a kei e athawnaw teh alouke hnonaw dawk na hno thai, eiteh na cat mahoe.

²⁵ Apihai thoseh, Cathut koe hmaisawi thuengnae sathei thaw ka cat e tami teh, a miphun dawk hoi takhoe lah ao han.

²⁶ Na onae hmuен tangkuem koe a thi thoseh, tava thi thoseh, thi tie pueng na cat mahoe.

²⁷ Apihai thoseh thi kacate tami teh miphun dawk hoi takhoe lah ao han.

²⁸ Cathut ni Mosi koe, na miphunnaw koe bout na dei pouh hane teh,

²⁹ Cathut koe roum thuengnae sathei ka thueng e tami ni teh ama ni thueng hane sathei, BAWIPA koe poe hanelah a thokhai han.

³⁰ Cathut hmalah takuep a sei vaiteh, takuep hoi athaw hah hmai hoi Cathut koe thueng e hah na thokhai han.

³¹ Vaihma ni athaw hah khoungroe van hmai a sawi vaiteh, Aron hoi a capanaw ni takuep teh a la awh han.

³² Roum thuengnae sathei thung dawk e aranglae aphai thueng hanelah. vaihma koe a poe han.

³³ Aron e capanaw thung dawk roum thuengnae sathei a thi hoi athaw thuengnae ka sak e tami ni aphai a ham han.

³⁴ Isarel miphunnaw ni a sak e roum thuengnae satheinaw thung dawk e rek sei e takuep hoi

aphai teh ka la vaiteh Isarel miphun Aron hoi a capanaw, yungyoe e aphung lah ka poe toe telah ati.

³⁵ Hottelah, Aron hoi a capanaw ni Cathut hmalah vahma thaw tawk hanelah, ahnimanaaw a rawinae hnin dawk BAWIPA koe, hmai hoi canei kawi naw thuengnae thung dawk e ahnimouh ni a ham awh hane doeht.

³⁶ Isarel miphunnaw dawk hoi e hot patet lae a coe a nahanelah, ahnimanaaw teh satui awinae hnin dawkvah BAWIPA ni kâ a poe toe.

³⁷ Hete lawk teh Isarel miphunnaw ni Sinai kahrawng dawk Cathut koe thuengnae a sak hanelah,

³⁸ Kâtapoenaeh hnin nah, Sinai mon dawk Cathut ni Mosi koe a poe e hmaisawi thuengnae, tavai thuengnae, yon thuengnae, kâtapoe thuengnae, thaw poe thuengnae hoi roum thuengnae naw doeht atipouh.

8

Aron hoi a capanaw thoungnae

¹ Cathut ni Mosi koe bout a dei pouh e teh,

² Aron hoi a capanaw ni a khohna hane naw, kâhluk han satui, yon thueng nahan maitotan, tutan, kahni touh, tonphuenhoehe tangthung buet touh a tho khai vaiteh,

³ Rangpui kamkhuengnae lukkareiim takhang hmalah, tamimaya abuemlah kamkhueng sak awh, telah Mosi koe kâ a poe e patetlah,

⁴ Mosi ni a tawk teh, tamimaya teh lukkareiim takhang hmalah a kamkhueng awh.

5 Mosi ni hai tamimaya koe Cathut ni hettelah lawk na thui toe atipouh teh,

6 Cathut ni lawkthui e patetlah Aron hoi a capanaw a kaw teh tui a pâhluk hnukkhu,

7 Aron hai angki a kho sak teh, taisawm a kâyeng sak. Angkidung a kho sak teh, vaihma angki a kâkhu sak. Vaihma angkikep khan nahan e a meikahawicalah kawng e angki a kho sak teh a khan pouh.

8 A lungtabue a ramuk sak teh athung vah, Urim hoi Thummim hah a hruek.

9 A lû dawkvah lupawk a pawk teh, kathouunge sui phen lupawk hmalah a bet.

10 Cathut ni lawkthui e patetlah Mosi ni a hluk nahane satui a la teh, lukkanreiim hoi athung e puengcangnaw pueng hah a hluk teh a thoungsak.

11 Hote satui hah khuungroe puengcangnaw pueng thoseh, maroi hoi a khok hai thoseh, thoung sak hanelah a hluk.

12 Hluk nahan e satui hah Aron e lû dawk a pouh teh, thoung sak hanelah a hluk.

13 Aron e a capanaw hai angki a kho sak. Taisawm hai a kâyeng sak teh, bawilakhung a huem sak.

14 BAWIPA ni a dei pouh e patetlah yon thueng nahanelah maitotan a hrawi teh, Aron hoi a capanaw ni a lû van a kut a toungh pouh han.

15 Maito a thei vaiteh, Mosi ni khuungroe petkâtue lah kinaw dawk thi hah a kutdawn hoi a la teh, khuungroe hah a thoung sak hnukkhu, kacawie a thi hah khuungroe kung koe

a rabawk vaiteh, hote khuungroe van yon thueng nahanlah a thoungsak han.

¹⁶ A ruen ka ramuk e ahrei, athin van e maimara, kuen kahni touh dawk e athaw na la vaiteh, khuungroe van hmai na sawi han.

¹⁷ A vuen, a moi, a ei hoi cungtalah maito buem hah alawilah hmaisawi han.

¹⁸ Cathut ni lawk na thui e patetlah hmaisawi thueng nahane hah a thokhai teh, Aron hoi a capanaw ni tu lû van kut a toun sin awh.

¹⁹ Tu a thei hnukkhu, Mosi ni khuungroe petkâtue lah a thi a kahei.

²⁰ Tu hah koung a raban hnukkhu, a lû, a moinaw hoi athaw hah hmai a sawi.

²¹ A von thung e naw hoi a khoknaw tui a pâsu teh, tu buem hah, khuungroe van hmai a sawi. Hmuitui hanlah hmaisawi thuengnae lah ao.

²² Cathut ni lawkthui e patetlah louke tu yueng lah, a rawi e tu a thokhai vaiteh, Aron hoi a capanaw ni tu lû van kut a toun pouh awh.

²³ Tu a thei hnukkhu, Mosi ni thi a la teh, Aron e aranglae hnârakong dawk thoseh, aranglae kut pui hoi aranglae khokpui dawk thoseh, a hluk pouh.

²⁴ Aron e a capanaw hai a kaw teh, ahnimouh e, aranglae hnârakong, aranglae kutpui hoi khokpui dawk hai thoseh a hluk pouh hnukkhu, khuungroe van petkâtue lah a kahei.

²⁵ A thaw, a mai, a ruen ka ramuk e a hrei, a thin ka ramuk e maimara, a kuen kahni touh hoi akuen ka ramuk e athaw, aranglae apha,

²⁶ Cathut hmalah tangthung dawk ta e ton-phuenhoehe buet touh, satui hoi sak e vaiyei a

phen buet touh, vaiyei karê e buet touh a la teh,
satui hoi aranglae aphaï van a hruek hnukkhu,

²⁷ Aron e a kut, a capanaw e a kut dawk, hote
hnonaw hah a hruek teh, Cathut e hmalah a
kahek teh, kahek thuengnae a sak.

²⁸ Mosi ni ahnimaë a kut dawk e a la teh,
khoungroe van, hmaisawi thuengnae sathei hoi
cungtalah hmai a sawi han. Hmuitui teh thaw
poe thuengnae lah ao. BAWIPA koe hmai hoi
thuengnae lah ao.

²⁹ Hathnukkhu, Mosi ni takuep a la teh BAW-
IPA hmalah a kahek teh kahek thuengnae a sak.
Tu takuep teh Mosi ham lah ao.

³⁰ Mosi ni khoungroe van kaawm e a thi hoi
kâhluk hane satui a la teh, Aron hoi a khohna
e dawk thoseh, a capanaw hoi a khohna e
naw dawk hai thoseh, a kahei teh, Aron hoi a
capanaw, khohnanaw a thoungsak.

³¹ Mosi ni Aron hoi a capanaw koe, hote
thi moi hah kamkhuengnae lukkareiim takhang
teng a thawng awh. BAWIPA ni Aron hoi a
capanaw ni hote moi, a ca awh han, telah kai
koe lawk na thui e patetlah hote moi thoseh,
thawpoe thuengnae tangthung dawk kaawm e
vaiyei thoseh, hote hmuen koe cat awh.

³² Kacawie moi hoi vaiyei teh hmai na sawi
han.

³³ Thawpoe thoungnae hnin sari akuep
hoehnahlan kamkhuengnae lukkareiim takhang
thung hoi alawilah na tâcawt mahoeħ.
Bangkongtetpawiteh, hnin sari touh thung na
kamthoung awh han.

³⁴ Sahnin na sak a e patetlah nangmouh hane yon thuengnae na sak a hanelah Cathut ni lawk na thui awh toe.

³⁵ Hatdawkvah, nangmouh duenae dawk hoi na hlout a nahanelah, kamkhuengnae lukkareiim takhang teng vah, hnin sari touh thung karum khodai na o awh vaiteh, Cathut ni kâ na poe e na tarawi awh han. Hottelah Cathut ni lawk na thui toe tie patuen ka dei e lah ao teh,

³⁶ BAWIPA ni Mosi koehoi lawk thui e naw pueng Aron hoi a capanaw ni a sak awh.

9

Aron ni thueng e BAWIPA ni a dâw

¹ A hnin taroe hnin dawk Mosi ni Aron hoi a capanaw, Isarel miphun, kacuenaw a kaw teh,

² Aron koe, nang ni yon thueng nahanelah, kacueme maito kum kanaw e buet touh, hmaisawi thueng nahanelah, kacueme tutan buet touh, na thokhai vaiteh, Cathut hmalah thuengnae sak loe.

³ Isarel miphunnaw koehai thoseh, nangmouh ni yon thueng nahanlah, hmae kum kanaw e buet touh, hmaisawi thueng nahanlah, âvâ ka cawt hoeh rae maitoca buet touh,

⁴ Tuca buet touh, BAWIPA koe roum thueng nahanlah, maitotan buet touh, tutan buet touh, satui hoi kalawt e vaiyei thuengnae hah thokhai loe. Sahnin nangmouh koe BAWIPA a kamnue han telah dei pouh loe atipouh.

⁵ Mosi ni kâ a poe e patetlah kamkhuengnae lukkareiim hmalah a thokhai hnukkhu, tamimaya naw ni a hnai teh, BAWIPA hmalah a kangdue awh.

⁶ Mosi ni hai nangmouh ni BAWIPA ni kâ na poe e patetlah hottelah na sak awh teh, BAWIPA e bawilennae teh nangmouh koe a kamnue han telah atipouh.

⁷ Mosi ni Aron koe, khuungroe koe, cet nateh, Cathut ni kâ na poe e patetlah nama e thuengnae, hmaisawi thuengnae sak nateh, nama hoi na taminaw hanelah, yonthanae sak awh. Taminaw ni a thokhai e sathei thuengnae a thueng teh taminaw hanlah yonthanae sak awh, telah atipouh.

⁸ Aron ni hai khuungroe koe a cei teh, ama hanlah yon thuengnae maitoca a thei.

⁹ A capanaw ni a thi a sin awh teh, Aron ni a kutdawn thi dawk a ranup teh, khuungroe kinaw dawk a hlun hnukkhu, kacawie a thi hah khuungroe kung koe a rabawk.

¹⁰ Yon thuengnae sathei thaw, akuen, athin van e maimara hah khuungroe van hmai a sawi. Hottelah, Cathut ni Mosi koe kâ a poe.

¹¹ A moi hoi a vuen teh alawilah hmai a sawi.

¹² Hmaisawi thuengnae sathei hai a thei teh a capanaw ni Aron koe thi a poe teh ahni ni khuungroe petkâtue lah a kahei.

¹³ Ahnimanaaw ni hmaisawi thuengnae sathei moi, takpatinaw hoi a lû hah a poe teh Aron ni khuungroe van hmai a sawi.

¹⁴ A vonthung e naw hoi a khoknaw hah a pâsu teh, khuungroe van kaawm e sathei hoi cungtalah hmai sawi.

¹⁵ Taminaw ni thueng nahanelah a thokhai teh, taminaw e yon thuengnae lah kaawm e hmae a thei hnukkhu, ahmaloe e patetlah yon thuengnae a sak.

¹⁶ Hmaisawi thuengnae sathei hai a thokhai awh teh, hot patetlah a sak.

¹⁷ Tavai thuengnae hai a sin teh, vai touh kasum a la teh, khuungroe dawk amom lah hmaisawi thuengnae khuungroe dawk hmai a sawi.

¹⁸ Taminaw hanelah roum thuengnae maitotan, tutan hai a thei awh teh, a capanaw ni thi a sin hnukkhu, khuungroe van petkâtue lah thi a kahei awh.

¹⁹ A mai hoi a ruen ka ramuk e ahrei, a kuen, a thin van e a maimaranaw, tu hoi maito e athaw hah,

²⁰ A takuep van a toungh vaiteh, khuungroe dawk hmai a sawi.

²¹ Takuep hoi aranglae apha hah BAWIPA hmalah a kahek teh kahek thuengnae a sak. Hottelah, sak hanelah Mosi ni kâ a poe.

²² Aron ni amae kut a dâw teh, ayânaw yawhawi a poe teh, yon thuengnae, hmaisawi thuengnae, roum thuengnae a sak hnukkhu, a kumcathuk.

²³ Mosi hoi Aron ni kamkhuengnae lukkareiim thung bout a kâen teh a tâco hnukkhu, taminaw yawhawinae a poe teh, BAWIPA e bawilennaeh teh taminaw koe a kamnue.

²⁴ Cathut koehoi hmai a tâco teh, khuungroe van kaawm e hmaisawi thuengnae sathei hoi athaw, hmai a kak. Hote taminaw ni a hmu awh navah a hram awh teh a tabo awh.

10

Nadab hoi Abihu duenae

¹ Aron e a capa Nadab hoi Abihu ni hmai sinnae tawngben a la roi teh, hmai a hruek roi. Hmai dawk hmuitui a phuen hnukkhu, BAWIPA ni kâ a poe hoeh e ka talue e hmai hoi thuengnae a sak roi.

² Hatdawkvah, BAWIPA koehoi hmai a tâco teh, BAWIPA hmalah hmai a kak teh a due roi.

³ Mosi ni Aron a kaw teh BAWIPA ni KAI teh kathoung lah ka o dawkvah, KAI koe kâhnai han kangainaw ni a pâkuem hane teh tami pueng ni ka lentoenae a bari awh han telah ka dei navah, Hot patetlah e doeh ka dei ngai telah ati hnukkhu, Aron teh lawkkamuem lah ao.

⁴ Mosi ni Aron e a na pa kanaw, Uzziel e capa Mishael hoi Elzaphan a kaw teh, tho roi haw, na hmaunawng ha roi hah, hmuen kathoung koehoi alawilah kâkayawn roi ei telah atipouh e patetlah,

⁵ Ahnimouh roi ni a tho roi teh, angki khohna khue hoi rim alawilah a kâkayawt roi.

⁶ Mosi ni Aron hoi a capa roi, Eleazar hoi Ithamar a kaw teh, nangmouh hai na due awh han. Taminaw pueng koe lungkhueknae phat payon vah ti a ngaihri teh, na bawilakhung rading awh hanh, khohna phi awh hanh. Hmaunawng ha Isarel miphun abuemlah Cathut ni hmai hoi a kak sak e duengma khuikapkhai awh.

⁷ Nangmouh na due awh hoeh nahanelah, tamimaya kamkhuengnae takhang alawilah, tâcawt awh hanh. BAWIPA e satui awinae

nangmouh koe ao telah, Mosi ni a dei e patetlah a sak awh.

⁸ BAWIPA ni Aron koe bout a dei pouh e teh,

⁹ Nang hoi na capanaw ni due awh hoeh nahanlah thoseh, kathoung hoi kathounghoehe, kakhin hoi

¹⁰ Kakhin hoeh e hnonaw, na kapek thai nahanlah thoseh,

¹¹ BAWIPA ni Mosi koe a dei pouh e kâlawknaw hah, Isarel miphunnaw koe cangkhai thai nahanelah thoseh, kamkhuengnae lukkareiim dawk na kâen awh navah, Misurtui hoi paruithai e naw net awh hanh. Na miphun, catounnaw totouh na tarawi awh han e phung lah ao telah atipouh.

¹² Mosi ni hai Aron hoi kahring rae capa Eleazar hoi Ithamar a kaw teh, BAWIPA koe hmaisawi thuengnae tavai kacawie lat nateh, tonphuenhoehe, khuungroe teng cat awh. Kathoung poung e lah ao.

¹³ Cathut koe hmai hoi thuengnae teh nang hoi na capanaw ni coe hane kawi lah ao dawkvah, hmuen kathoung koe na ca awh han. Bangkongtetpawiteh, Hottelah kâpoe e lah ao dawk doeh.

¹⁴ Kahek e takuep hoi dâw e kahek e aphaí teh, nama hoi cungtalah, na canaw hoi hmuen kathoung koe na ca awh han. Isarel miphunnaw ni roum thuengnae sathei thung dawk e nang hoi na capanaw ni ham hane kawi lah ao.

¹⁵ Hmaisawi thuengnae sathei thaw hoi cungtalah dâw e aphaí, kahek e takuep, BAWIPA hmalah a kahek vaiteh, BAWIPA ni kâ a poe e

patetlah nama hoi na capanaw ni yungyo e a ham han kawi phung lah ao han telah ati.

¹⁶ Mosi ni yon thuengnae hmae panki laihoi a tawng eiteh, pâphawng hoeh. Hmaisawi thuengnae lah oun a sak toe. Hatdawkvah, Aron e a capa Eleazar hoi Ithamar koe a lungkhuek teh,

¹⁷ Bangkongmaw, yon thuengnae sathei moi teh, a thoungpoung. Hatei, nangmouh ni rangpuinaw e yon na ham teh, BAWIPA hmalah ahnimouh hanelah yon thuengnae sak hanelah, hote sathei moi na poe a eiteh, bangkongmaw hmuen kathoung koe na ca awh hoeh vaw.

¹⁸ Hote sathei thi haiyah, hmuen kathoung koe na thokhai awh hoeh vaw. Kai ni lawk na thui e patetlah hmuen kathoung koe sathei moi ca han na tet awh pawiteh,

¹⁹ Aron ni sahnin ahnimouh ni taminaw hanlah, yon thuengnae sathei, hmaisawi thuengnae sathei, yo a thueng awh han toe. Kai koe hot patetlah e hno a tho dawkvah, sahnin yon thuengnae sathei moi ka cat pawiteh, Cathut lungyouk han na maw telah Mosi koe atipouh.

²⁰ Mosi ni hote lawk a thai navah a lungkuep.

11

Kathoung hoi kathounghoehe saring

¹ BAWIPA ni Mosi hoi Aron bout a kaw teh,

² Nangmouh roi ni Isarelnaw koe patuen bout na dei pouh hane teh, talai van kaawm e moithang pueng dawk,

³ A khoksa men samka ni teh a thepkaai e moithangnaw teh ca thainae kâ ao.

⁴ Hatei, thepkaai ni teh khoksumen samka hoeh e moithang thung dawk, ca hoeh hane moithangnaw teh Kalauk teh athepai hoeh eiteh khoksumen samka hoeh dawkvah nangmouh hanlah thoung hoeh.

⁵ Kovei teh thepkaai eiteh a khoksumen samka hoeh dawkvah nangmouh hanlah thoung hoeh.

⁶ Saveh teh thepkaai eiteh a khoksumen samka hoeh dawkvah nangmouh hanlah thoung hoeh.

⁷ Vok teh a khoksumen samka eiteh thepkaai hoeh dawkvah nangmouh hanlah thoung hoeh.

⁸ Hot patet e moithangnaw e a moi na cat awh mahoeh. Ro haiyah na tek awh mahoeh. Kathounghoehe lah na pouk awh han.

⁹ Tuipui hoi sawkca dawk kaawm e moithangnaw thung dawk a rathei hoi a lakep kaawm e teh na ca awh han.

¹⁰ A rathei hoi a lakep kaawm hoeh e tuipui hoi sawkca dawk kaawm e moithang pueng teh nangmouh hanlah thoung hoeh.

¹¹ A rathei hoi a lakep kaawm hoeh e tui dawk e moithang na cat awh mahoeh.

¹² A ronaw hai panuettho e lah na pouk awh han.

¹³ Nangmouh ni panuettho e lah na pouk awh vaiteh na ca awh hoeh hane tavanaw teh: Mataw, Langta, Tawbu,

¹⁴ Mataw phun,

¹⁵ Vonga phun kuep,

¹⁶ Kalauk tava, bukbu phun kuep, batuiling phun kuep,

¹⁷ Kawhna hoi balengek,

¹⁸ Tuicawmpai,

¹⁹ Butakok phun kuep, Bongpi, Bongcakhat phun kuep,

²⁰ A rathei ka tawn ni teh a khok pali touh hoi kacetnaw pueng teh nangmouh hanlah kathounghoehe lah ao.

²¹ Hateiteh, a rathei a tawn teh a khok pali touh hoi ka cet e phun dawk dawkcawk nahanlah a khok kasaw poung naw teh:

²² Samtong, pâluen, tawktaboe, Tawngkaruet-naw teh na ca awh han.

²³ A rathei ka tawn ni teh a khok pali touh hoi ka cet e alouke moithang pueng teh nangmouh hanlah thoung hoeh.

²⁴ Hote moithang lahoi nangmae thoungnae hah a khin thai. Hot patet e ro katek e tami teh tangmin totouh thoung hoeh.

²⁵ Hote kadout e ro ka sin e tami teh khohna a pâsu han, tangmin totouh thoung hoeh.

²⁶ A khoksamen samka hoeh e, a thepkaai hoeh e saring pueng teh nangmouh hanlah thoung hoeh.

²⁷ A khoksamen samka hoeh e saring pueng teh nangmouh hanlah thoung hoeh. Hote ro ka tek e tami teh tangmin totouh thoung hoeh.

²⁸ Hote ro ka phawt e tami pueng teh a khohna a pâsu han. Tangmin totouh thoung hoeh.

²⁹ Talai dawk a vonpui hoi kâva e saring thung dawk thangbui, moihnam, Insi phun,

³⁰ Tawkkei, Tawngkang, Cingkadawt, Dekko hoi Khaipadounnaw teh nangmouh hanlah thoung hoeh.

³¹ Hotnaw e ro katek e tami teh tangmin totouh thoung hoeh.

³² Hote kadout e a ro hah thingkawlung, khohna, a pho, cawngko patetlah e im dawk e hno e buet touh van bawt pawiteh thoung hoeh. Tui dawk ranup han. Tangmin totouh thoung hoeh. Hathnukkhu a thoung han.

³³ Talai hlaam buetbuet touh van ro hah bawt pawiteh, Hote talai hlaam teh a thoung hoeh dawkvah rek hem han.

³⁴ Hote talai hlaam dawk e tui cakawi moi van vah, bawt pawiteh moi thoung hoeh. Hote talai hlaam dawk e nei hane tui hai thoung hoeh.

³⁵ Takhuen dawk thoseh, lunghmu dawk thoseh, hote hno buetbuet touh bawt pawiteh nangmouh hanelah a thoung hoeh dawkvah, peng raphoe han.

³⁶ Hatei, sambuem, tai e tui im teh kathounghoehe lah awm hoeh. Ro ni a bosin e dueng doeh kathounghoehe lah ao.

³⁷ Cati dawk hote ro bawt pawiteh, Cati teh kathounghoehe lah awm mahoeh.

³⁸ Tui dawk padung tangcoung e cati dawk hote ro bawt pawiteh cati teh nangmouh hanlah thoung hoeh.

³⁹ Nangmouh ni na ca han kawi saring dout pawiteh, ro katek e tami teh tangmin totouh thoung hoeh.

⁴⁰ Hote ro ka cat e tami teh a khohna a pâsu han. Tangmin totouh thoung hoeh. Hote ro ka phawt e tami hai amae a khohna a pâsu han. Tangmin totouh thoung hoeh.

⁴¹ Talai dawk kâva e saringnaw pueng teh panuettho e lah ao dawkvah na cat awh mahoeh.

⁴² A khok tawn hoeh, a von hoi ka cet e thoseh, khok pali touh hoi ka cet e thoseh, khok pali hlak kapap e khok hoi ka cet e thoseh, talai dawk kâva e saring buet touh boehai na cat awh mahoe. Panuetkatho e lah ao.

⁴³ Kâva e saring buetbuet touh kecu nama-hoima kâkhinsak awh hanh. Hotnaw hoi nama kâkhinsak awh hanh.

⁴⁴ Kai teh nangmae BAWIPA Cathut lah ka o. Kai teh kathoung dawkvah nangmouh haiyah namahoima kâthoung sak awh nateh thoungnae tawn awh. Talai dawk kâva e saring buet touh boe hoi hai kâkhinsak awh hanh.

⁴⁵ Kai teh nangmae Cathut lah ka o nahanelah nangmouh teh Izip ram hoi na ka rasat e BAWIPA lah ka o. Kai teh kathoung dawkvah nangmouh hai thoungnae tawn awh.

⁴⁶ Hetnaw teh, kathoung, kathoung hoeh, cakawi hoi cakawi hoeh e saringnaw kapek thai nahanelah,

⁴⁷ Moi, tava, tui dawk kaawm e moithang, talai dawk kâva e moithangnaw puenghoi ka kâkuen e phunglawk doeh ati.

12

Camo khe hnukkhu kamthoungnae

¹ Cathut ni Mosi koe bout a dei pouh e teh, nang ni Isarel miphunnaw koe patuen na dei pouh hane teh,

² Napui ni camo a vawn teh ca tongpa a khe hnukkhu, Kampheng nah hnin sari touh a thounghoeh e patetlah hnin sari totouh kathoung hoeh lah ao han.

³ Ataroe hnin nah vuensom a a pouh han.

⁴ Hat hnukkhu, thipaling kecu dawk a manu teh hnin sari touh a kâthoung sak lah ao han. A kâthoung saknae hnin akuep hoehroukrak kathoung hno tek mahoeh. Hmuen kathoung koehai cet mahoeh.

⁵ Hateiteh, napui khe pawiteh, kamphengnae patetlah yat hni touh thung kathounghoehe lah ao han. Thipaling kecu dawk hnin 66 touh a kâthoung sak han.

⁶ Ca tongpa thoseh, napui thoseh, kâthoung saknae hnin akuep torei teh, hmaisawi thueng nahanelah âvâ ka cawt hoeh rae tu ca buet touh, yonthueng nahanelah âbakhu buet touh, hoehpawiteh bakhu buet touh hah kamkhueng-nae lukkareiim takhang hmalah, vaihma koe a thokhai han.

⁷ Vaihma ni BAWIPA hmalah thuengnae a sak vaiteh, hote napui hanlah yon thuengnae a sak pouh vaiteh, ahni teh thi kârabawknae yon dawk hoi a thoung han.

⁸ Tuca coung thai hoehpawiteh, bakhu kahni touh thoseh, âbakhu ca kahni touh thoseh, hmaisawi thueng nahanlah buet touh, yon thueng nahanlah buet touh a thokhai vaiteh, vaihma ni ahni hanlah thuengnae a sak pouh vaiteh ahni teh a thoung han. Hete phunglawk teh ca tongpa, ca napui ka khe e manu hoi kâkuen e phunglawk doeh telah atipouh.

13

Hrikbei phunglawk

¹ BAWIPA ni Mosi hoi Aron koe bout a dei e teh,

² Tami ni a vuen dawk hluetkaco e thoseh, takpatha nakunghai thoseh, bahlaw thoseh, hrikbei mitnoutnae kamnuek pawiteh, hote tami hah vaihma Aron koe thoseh, a capa vaihma buetbuet touh koe thoseh, a thokhai han.

³ Vaihma ni hote tami e a vuen dawk e patawnae a khet vaiteh, patawnae dawk e a muen pangaw pawiteh patawnae teh vuen thung tak dawk ka phat e patetlah awm pawiteh ka hrikbei e doeh. Vaihma ni hote tami a khet hnukkhu, thoung hoeh telah a pouk han.

⁴ Bahlaw teh pangaw pawiteh vuen thung ka phat e mahoe. Muen pangaw hoehpawiteh vaihma ni ka pataw e tami hah hnin sari touh a paung han.

⁵ Asari hnin vaihma ni a khet navah a vuen dawk e patawnae kampai hoehpawiteh hnin sari touh bout a paung han.

⁶ Asari hnin bout a khet navah ama paroup ni teh meimei tamang pawiteh hote tami teh a thoung telah vaihma ni a pathang han. Ka pathak rumram e lah doeh ao. Amae khohna a pâsu vaiteh kathoung lae ao.

⁷ Thoung sak hanelah vaihma ni a khet hnukkhu, ka pathak e hoehoe lui pawiteh,

⁸ Hote tami teh kathounghoehe lae a pathang vaiteh ka hrikbei e tami lae a khoe han.

⁹ Ka hrikbei e tami hah vaihma koe a ceikhai awh han.

¹⁰ Vaihma ni a khet navah, a vuen dawk ka pâphu ni teh a muen pangaw pawiteh, pâphu e dawk cawcawyu pawiteh,

¹¹ Hrikbei karuem e doeh. Kathounghoehe tami telah vahma ni a pouk vaiteh a paung han.

¹² Ka hrikbei e tami teh atak buemlah a lû koehoi a khok koe totouh, vahma ni a khet navah hrikbei kingkawi pawiteh,

¹³ Hot patet e atak dawk king kakawi e tami teh a thoung telah vahma ni a pathang han. atak buemlah koung a pangaw dawkvah ahni teh a thoung.

¹⁴ Hateiteh, atak dawk cawcawyu pawiteh thoung hoeh.

¹⁵ Vahma ni atak dawk cawcawyu e a khet navah, hote tami teh kathounghoehe lah a pathang han. Atak dawk cawcaw ka yu e tami teh thoung hoeh, ka hrikbei katang e doeh.

¹⁶ Cawcaw ka yu e atak kâthung lah bout pangaw pawiteh vahma koe bout a thokhai han.

¹⁷ Vahma ni a khet navah patawnae bout pangaw e hah hmawt pawiteh vahma ni a thoung telah a pathang vaiteh, ahni teh a thoung toe.

¹⁸ Vuen dawk âhlut ao teh a dam hnukkhu,

¹⁹ Âhlut a onae a hmâ pangaw dawk a phing nakunghai thoseh, pangawpanang e hrikbei patetlah kamnuek pawiteh, vahma ni a khet vaiteh,

²⁰ Vuen thung lah a pha teh a muen pangaw pawiteh hote tami teh vahma ni thoung hoeh telah a pathang han. Âhlut koehoi ka hrikbei e lah ao.

²¹ Vahma ni a khet navah a muen ka pangaw e awm hoeh, vuen thung lah phat hoeh, meime tamang pawiteh vahma ni hote tami hah hnин

sari touh a paung han.

22 Vuen dawk hmâ hoehoe len pawiteh hote tami teh vaihma ni thoung hoeh telah a pathang han. Hote tami teh ka hrikbei e doeh.

23 Hateiteh, kâlum e kampuen hoeh, kampai hoehpawiteh âhlut hmâ doeh. Hote tami teh a thoung telah a pathang han.

24 Tak dawk vuen hmai a kak teh hmaikakhma cawcaw ka yu e dawk ka paling pangaw lah awm pawiteh,

25 Vaihma ni a khet han. A hmâ dawk e muen a pangaw teh vuen thung ka phat e patetlah awm pawiteh hmai kak dawk hoi ka tho e hrikbei doeh. Hote tami teh thoung hoeh telah vaihma ni a pathang han. Hrikbei patawnae doeh.

26 Vaihma ni a khet navah a hmâ dawk a muen pangaw e awm hoeh, vuen thung phat hoeh, meimei tamang pawiteh vaihma ni hote tami teh hnin sari touh thung a paung han.

27 Apa sari hnin vaihma ni a khet navah, vuen dawk e hmâ hoe kampai pawiteh, hote tami teh thoung hoeh, hrikbei ka pataw e doeh telah vaihma ni a pathang han.

28 Hateiteh, vuen dawk kâlum e kampuen hoeh, kampai hoeh, meimei tamang pawiteh hmaikakhma karado e doeh. Hote tami teh vaihma ni a thoung telah a pathang han. Hmaikak hmâ rumram doeh.

29 Napui hoehpawiteh tongpa ni lû dawk thoseh, pâkha dawk thoseh, patawnae tawn pawiteh,

30 Vaihma ni a khet navah, vuen thung ka phat e lah ao teh a muen hai ka samenpanang lah

awm pawiteh hote tami teh thoung hoeh telah
vaihma ni a pathang han. Lû dawk e hai thoseh,
pâkha dawk e hai thoseh raipha patawnae doe.

³¹ Vaihma ni hote patawnae a khet navah, vuen
thung lah ka phat e lah awm hoeh, a muen hai
tamang hoehpawiteh, hote patawnae ka tawn e
tami hah vaihma ni hnin sari touh a paung han.

³² A hnin sari hnin vaihma ni a khet navah, a
hmâ kampai hoeh, a muen hai samen hoeh, vuen
thung lah phat hoeh pawiteh,

³³ Hote tami e muen a ngaw pouh han. Hma
dawk e muen teh ngaw pouh mahoe. Hnin sari
touh bout a paung han.

³⁴ A hnin sari hnin vaihma ni a khet navah,
vuen dawk e hmâ kampai hoeh, vuen thung lah
hai phat hoehpawiteh vaihma ni a thoung telah
a pathang han. Amae khohna hah a pâsu vaiteh
ahni teh kathoung lao han.

³⁵ a thoung toe telah a pathang hnukkhu,
raipha patawnae bout kampai pawiteh,

³⁶ Vaihma ni bout a khet vaiteh patawnae hoe
kampai katang pawiteh vaihma ni a muen ka
samen e tawng mahoe toe.

³⁷ Hote tami teh thoung hoeh. Hatei, raipha
hah ama paroup lao a hmu teh a muen ka
tamang e tacawt pawiteh raipha a kahma teh,
hote tami teh kathoung lao toun dawkvah,
vaihma ni hote tami hah a thoung toe telah a
pathang han.

³⁸ Napui hai thoseh, tongpa hai thoseh a vuen
dawk bahlaw awm pawiteh,

³⁹ Vaihma ni a khet navah phouhou e awm
pawiteh a vuen dawk e bahlaw doe. Hote tami

teh a thoung.

⁴⁰ Sam ka sarut e tami teh a lû luengpalueng nakunghai thoseh a thoung.

⁴¹ Tampa sam ka sarut e tami teh a tampanga nakunghai a thoung.

⁴² A lû luengpalueng e thoseh, tampa ka nga e thoseh, ka pangaw ka paling tâcawt pawiteh, hote bahlaw teh hrikbei doeh.

⁴³ Hat toteh, vaihma ni a khet vaiteh a vuen dawk hrikbei patetlah kamnuek pawiteh a nganae koe bahlaw pangaw paling lah tâcawt pawiteh,

⁴⁴ Hote tami teh thoung hoeh. Hrikbei patawnae ka tawn e doeh. Lû dawk patawnae a tâco dawk thoung hoeh telah a pathang han.

⁴⁵ Ka hrikbei e tami teh a kapawn e khohna hah a khohna han. Luhuem laipalah atunglae pahni a huem vaiteh kathoung hoeh, kathoung hoeh telah a hram han.

⁴⁶ Hote tami teh pou kathounghoehe, kakhin e tami lah ao. Kathounghoehe tami lah ao toungh dawkvah rim hloilah ao han.

⁴⁷ Ka hrikbei ni khohna e lukkarei thoseh, tu muen e thoseh,

⁴⁸ Kawng e thoseh, phaivuen e thoseh, phaivuen hoi sak e khohna thoseh,

⁴⁹ khohna ka kâbet e hmâ kahring ut lah, duk-paling lah kamnuek pawiteh, hrikbei patawnae doeh. Vaihma koe a patue han.

⁵⁰ Vaihma ni khohna dawk ka kâbet e a khet vaiteh, hnин sari touh a paung han.

⁵¹ Asari hnин bout a khet vaiteh khohna dawk patawnae teh, kawng e khohna dawk thoseh, phaivuen dawk thoseh, phaivuen hoi sak e

khohna dawk thoseh, thoung hoeh hoe kampai pawiteh a patawnae teh tangpha a payang thoung dawkvah, thoung hoeh. Hrikbei patawnae doeh toe.

⁵² Hote khohna kawng e dawk thoseh, tu muen e thoseh, phaivuen e thoseh, phaivuen hoi sak e khohna thoseh, hmai a sawi han. Bangkongtetpawiteh, a hrikbei toe.

⁵³ Hateiteh, vahma ni a khet navah, kawng e khohna, phaivuen hoi sak e khohna dawk patawnae kampai hoeh pawiteh,

⁵⁴ Khohna a pâsu hanlah kâ a poe vaiteh hnin sari touh bout a paung han.

⁵⁵ A pâsu hnukkhu vahma ni bout a khet navah, moihna hah kampai hoeh eiteh, patawnae amaparoup lah awm pawiteh thoung hoeh, hmai a sawi han.

⁵⁶ Athunglah thoseh, alawilah thoseh hmâ cawcawyu pawiteh, a pâsu hnukkhu vahma ni a khet vaiteh patawnae teh ka tamangpanang lah awm pawiteh, kawng e khohna, phaivuen dawk kâbet e hma kâlum e vek a phi han.

⁵⁷ Kawng e khohna, khohna hanlah sak e phaivuen dawk thoseh, hmâ bout kamnuek pawiteh kampai thai e patawnae doeh.

⁵⁸ Hot patet e patawnae kâbet e hnopai hmai a sawi han. Kawng e khohna, phaivuen hoi sak e khohna pueng, a pâsu vaiteh patawnae dam pawiteh apâhni lah bout a pâsu vaiteh a thoung han.

⁵⁹ Hete phunglam teh thoung hoi thounghoehnae pathang nahanelah, hrikbei kaman e hni, tumuen e khohna, kawng e khohna,

phaivuen hoi sak e khohna kawi hoi kâkuen e
kâlawn doeh telah ati.

14

Hrikbei kamthoungnae

- 1 Cathut ni Mosi koe,
- 2 Ka hrikbei e ni kamthoungnae hnin dawk a tarawi hane kawi phunglawk teh,
- 3 Hote tami hah vahma koe a kaw hnukkhu, vahma ni rim alawilah a tâco vaiteh a khet navah, hrikbei kahmat katang pawiteh,
- 4 Hote kathoung tami hanelah, kahring ni teh kathoung tava kahni touh, sidar thing, ka paling e pahla rui, dingsala dawn naw hah thokhai hanlah kâ a poe han.
- 5 Vaihma ni tava buet touh e hah tui tanae talai hlaam thung a thei sak hnukkhu,
- 6 Sidar thingphek, pahla rui paling, dingsala dawn hoi cungtalah kahring e tava a thokhai vaiteh, tava thi kalawt tangcoung e thi dawk a ranup hnukkhu,
- 7 Hrikbei kathoung hane tami dawk vai sari touh a kahei vaiteh, hote tami teh a thoung toe telah a pathang han. Hat hnukkhu kahring e tava hah kahrawngum anganae koe a tha han.
- 8 Thoung sak hane tami hah amae khohna a pâsu vaiteh, a sam koung a ngaw hnukkhu, thoung nahanelah tui a kamhluk han. Hath-nukkhu, rim dawk a kâen vaiteh, amae rim lawilah hnin sahnin touh ao han.
- 9 Asari hnin vah amae sam, pahnimuen, mit-muen, tak dawk kaawm e muen pueng a ngaw

vaiteh, amae khohna a pâsu hnukkhu, tui a kamhluk vaiteh, kathoungé lah ao han.

¹⁰ Apa taroe hnin dawk hai thoseh, kacueme âvâ ka cawt hoeh rae, tutanca kahni touh, a napui buet touh thoseh, tavai thueng hanelah, satui kalawt e tavai ephah pung hra pung touh, hoi satuum buet touh a thokhai han.

¹¹ Kathoungsakkung vaihma ni thoungsak hane tami hah tamimaya kamkhuengnae takhang teng BAWIPA hmalah a thokhai han.

¹² Vaihma ni tutanca buet touh a la vaiteh, kâtapoe thueng nahanelah a thueng vaiteh, BAWIPA hmalah kahek thueng nahanolah satuum buet touh hoi a kahek han.

¹³ Tuca hah yon thuengnae sathei, hmaisawi thuengnae sathei theinae hmuen kathoung koe a thei han. Bangkongtetpawiteh, yon thuengnae hai vaihma ni a ham e doe. Kathoung poung e lah ao.

¹⁴ Vaihma ni kâtapoe thuengnae sathei thi a la vaiteh, thoung sak lah kaawm e tami e aranglae a hnârakong dawk thoseh, aranglae kutpui hoi aranglae khokpui dawk thoseh, a hluk han.

¹⁵ Satui hai youn touh a la vaiteh, amae kuttabei dawk a awi hnukkhu,

¹⁶ Hote satui hah, aranglae a kudawn a ranup vaiteh, Cathut hmalah vai sari touh a kahek han.

¹⁷ A kut dawk e kacawie satui hah thoung sak lah kaawm e tami e a hnârakong dawk thoseh, aranglae kutpui hoi aranglae a khokpui dawk thoseh, kâtapoe thuengnae sathei thi a hluk han.

¹⁸ A kut dawk kacawi rae satui hah thoung sak lah kaawm e tami e a lû van a awi vaiteh, hote

tami hanelah yonthanae BAWIPA hmalah a sak han.

¹⁹ Hothloilah, thoung sak lah kaawm e tami hanelah, yontha nahanlah yon thuengnae sathei a thueng vaiteh, hmaisawi thuengnae sathei hah bout a thei han.

²⁰ Hmaisawi thuengnae hoi tavai thuengnae hah khoungroe dawk a thueng vaiteh, hote tami hanelah yonthanae a sak pouh vaiteh, hote tami teh a thoung han.

²¹ Hote tami teh a mathoe dawk, hottelah totouh coung thai hoeh pawiteh, a kahek vaiteh, kâtapoe thueng nahanelah, yonthanae sathei, tutanca buet touh thoseh, tavai thueng nahanelah, satui kalawt e tavai ephah pung hra pung touh, satuium buet touh hoi a thokhai han.

²² Hathnukkhu, a coung thai e patetlah bakhu kahni touh, hoehpawiteh, âbakhuca kahni touh hah, yon thueng nahanelah buet touh, hmaisawi thueng nahanelah buet touh, a thokhai han.

²³ Ama kâthoung nahanelah, BAWIPA hmalah kamkhuengnae lukkareiim takhang teng koe, vaihma koe ataroe hnin a thokhai hnukkhu,

²⁴ vaihma ni kâtapoena sathei, tuca hoi satuium buet touh a la vaiteh, BAWIPA hmalah kahek thuengnae a kahek han.

²⁵ Hottelah, tuca a thei hnukkhu, thi a la vaiteh, thoungsak hane tami, aranglae hnârakong dawk thoseh, aranglae kutpui hoi aranglae khokpui dawk thoseh a hluk han.

²⁶ Vaihma ni satui hai youn touh avoilae kuttabei dawk a awi han.

²⁷ Hote satui hah aranglae kutdawn hoi vai sari touh BAWIPA hmalah a kahei han.

²⁸ A kut dawk e kacawie satui hah thoungsak lah kaawm e tami e aranglae hnârakong dawk thoseh, aranglae kutpui hoi aranglae khokpui dawk thoseh a hluk hnukkhu, kaawm e satui hah kâtapoe thuengnae sathei thi dawk thoseh a hlun han.

²⁹ Ama koe kaawm rae satui hah, hote tami e a lû dawk a awi vaiteh, ahni hanlah yon thuengnae a sak pouh han.

³⁰ Hote tami ni bakhu thoseh, âbakhu thoseh,

³¹ Yon thueng nahanlah buet touh, tawai thuengnae hoi cungtalah, hmaisawi thueng nahanlah buet touh a thokhai vaiteh, Vaihma ni a thueng vaiteh, hote tami hanlah yonthanae BAWIPA hmalah a sak pouh awh han.

³² Hete phung teh ka hrikbei ni teh a thoung nahanlah ka tawn hoeh e mathoe hoi kâkuen e kâlawk lah ao telah atipouh.

³³ BAWIPA ni Mosi hoi Aron koe bout a dei pouh e teh,

³⁴ Kai ni na poe e Kanaan ram coe hanlah na kâen awh torei teh, na coe e ram buet touh dawk im buetbuet touh dawk Kai ni ka hrikbei sak pawiteh,

³⁵ Imkung ni vahma koe a cei vaiteh, Kaie im dawk ka hrikbei e ao patet telah tetpawiteh,

³⁶ Hote im dawk kaawm e pueng thounghoehnae koe phat payon vai ti ngaihri ao dawkvah, vahma ni ka hrikbei e hah a khet hoehnahlan, kaawm e pueng takhoe sak hanelah, kâ a poe han. Hathnukkhu, vahma ni a khet hanelah imthung a kâen han.

³⁷ Patawnae a khet nah tapang dawk kahring patet, ka paling patetlah ao teh tapang dawk a

hmâ kâbet e patetlah awm pawiteh,

³⁸ Imthung hoi alawilah a tâco vaiteh, hote im hah hnin sari touh thung tho a khan han.

³⁹ Asari hnin vahma ni bout a khet vaiteh, tapang dawk patawnae hoe kampai pawiteh,

⁴⁰ Hmâ kâbetnae talungnaw hah a la vaiteh, kho alawilah kakhin e hmuen koe tâkhawng hanelah kâ a poe han.

⁴¹ Hote imthung petkâtue lah a koe sak han. A koe e naw hah kho alawilah a khinnae hmuen koe a rabawk han.

⁴² Apasueke talung e hmuen koe louke talung hah a la vaiteh, a ta hnukkhu, louke lungphen hoi bout a pathoup han.

⁴³ Hottelah, talung a la vaiteh, im a koe e naw bout a pathoup hnukkhu, patawnae bout tawn rah pawiteh,

⁴⁴ Vaihma ni a khet hanelah bout a tho navah hote im dawk patawnae hoe kampai pawiteh, tak kacate hrirkbei doeh. Hote im hah thoung hoeh e lah ao dawkvah,

⁴⁵ talung, thing, tangpung kaawm e pueng a raphoe vaiteh, kho alawilah kakhin e hmuen koe a hruek han.

⁴⁶ Hothloilah, hote imrakhan dawk kâen e pueng teh tangmin totouh thoung hoeh.

⁴⁷ Hote im dawk ka ip e tami, ka catnet e tami teh, amae khohna a pâsu han.

⁴⁸ Im teh a pathoup hnukkhu, vaihma ni a khet navah, patawnae kampai hoehpawiteh, a dam toung dawkvah, hote im teh a thoung toe telah a pathang han.

⁴⁹ Hote im a thoung nahanelah tava kahni

touh, sidarthing, pahla paling hoi dingsala a sin vaiteh,

⁵⁰ tui kalawng e tanae talai hlaam thung, tava buet touh e a thei han.

⁵¹ Sidarthing, dingsala, pahla paling hoi kahring e tava a la vaiteh, tava thi hoi kalawt e tui dawk a ranup hnuukkhu, hote im dawk vai sari touh a kahei han.

⁵² Hottelah, tava thi, kalawng e tui, kahring e tava, pahla paling, dingsala hoi sidarthing hoi im thoung sak hnuukkhu,

⁵³ Kahring e tava hah a ngainae koe kho alaw-ilah a tha vaiteh, hote im hanelah yonthanae a sak vaiteh, a thoung han.

⁵⁴ Hete phung heh hrikbei patawnae phunkuep hoi raipha patawnae,

⁵⁵ Khohna dawk kâbet e hrikbei hoi im dawk kâbet e hrikbei.

⁵⁶ Tak dawk ka pâphu e, ka pathak e, kâlum e hrikbei, hot patet e kong dawk,

⁵⁷ athoung hoi athounghoeh e kapek vaiteh, panue thai nahanelah, poe e kâlawk doeh telah atipouh.

15

Tak dawk hoi ka tâcawt e hno kathounghoehe

¹ BAWIPA ni Mosi hoi Aron koe bout a dei pouh e teh,

² Nangmouh roi ni Isarel miphunnaw koe na dei pouh hane teh, tongpa tie pueng atak dawk lacip tâcawt pawiteh, hote lacip teh thoung hoeh.

³ Pou a tâco nakunghai thoseh, avaivai a tâco nakunghai thoseh, hote tami teh thoung hoeh.

⁴ A inae, a tahungnae naw pueng hai thoung hoeh.

⁵ Ahnie ikhun kâbet e tami, a tahungnae dawk ka tahung e tami teh,

⁶ Ahnie tak kâbet e tami hoi,

⁷ Tamtui kâbet e tami teh amae e khohna a pâsu vaiteh tui a kamhluk han.

⁸ Hote tami teh tangmin totouh thoung hoeh.

⁹ A kâcuinae rangdoun hai thoung hoeh.

¹⁰ Hote tami e rahim kaawm e hno kâbet e tami teh tangmin totouh thoung hoeh. Hote hno buetbuet touh ka sin e tami teh amae khohna a pâsu vaiteh tui a kamhluk han. Tangmin totouh thoung hoeh.

¹¹ Lacip ka tâcawt e tami ni a kut pâsu laipalah alouke tami a kut hoi tek pawiteh, hote tami teh a khohna a pâsu vaiteh tui a kamhluk han. Tangmin totouh thoung hoeh.

¹² Lacip ka tâcawt e tami ni a kâbet e talai hlaam rek hem han. Thingtongben teh tui hoi pâsu han.

¹³ Lacip ka tâcawt e tami a patawnae a dam torei teh, a damnae hnin hoi a kamtawng vaiteh, hnin sari touh aloum hnukkhu, amae khohna a pâsu vaiteh, tui kalawng a kamhluk vaiteh a kamthoung han.

¹⁴ Ataroe hnin vah, bakhu kahni touh thoseh, âbakhu kahni touh thoseh buetbuet touh Cathut hmalah kamkhuengnae lukkareiim takhang koe a thokhai vaiteh vahma koe a poe han.

¹⁵ Vaihma ni yon thueng nahanelah buet touh, hmaisawi thueng nahanelah buet touh a thueng

vaiteh lacip ka tâcawt e tami hanelah BAWIPA hmalah yonthanae a sak pouh han.

¹⁶ Tongpa ni a yangtui tâcawt pawiteh tui a kamhluk han. Tangmin totouh thoung hoeh.

¹⁷ A yangtui kâbet e pueng teh tui hoi pâsu han. Ama hai tangmin totouh thoung hoeh.

¹⁸ Tongpa ni napui hoi ip roi pawiteh tui a kamhluk roi han. Tangmin totouh thoung hoeh.

¹⁹ Napui ni kampheng pawiteh hnin sari touh thung thoung hoeh. Ahni kâbet e tami hai tangmin totouh thoung hoeh.

²⁰ A kampheng lahun nah a inae hoi a tahungnae naw pueng hai thoung hoeh.

²¹ Ahnie a inae hoi a tahungnae ka kâbet e tami teh amae khohna a pâsu vaiteh tui a kamhluk han.

²² Hote tami teh tangmin totouh kathounghoehe lah ao.

²³ A inae ikhun dawk thoseh, a tahungnae dawk thoseh, a pacâ e thi ka kâbet e tami teh tangmin totouh thoung hoeh.

²⁴ Ka kampheng e napui hoi ka ip e tami teh hnin sari touh thung thoung hoeh. A inae pueng haiyah thoung hoeh.

²⁵ A kamphengnae hnin akuep hnukkhu, a thi khap hoeh rah pawiteh, a thikhap hoehroukrak, kamphengnae tueng patetlah thoung hoeh.

²⁶ A thikui e a dam hoehroukrak ahnie a inae hoi a tahungnae teh a kamphengnae patetlah thoung hoeh.

²⁷ Hote hnonaw ka kâbet e tami hai a thounghoeh dawkvah amae e khohna a pâsu

vaiteh tui a kamhluk han. Tangmin totouh thoung hoeh.

²⁸ Hote napui teh thikui e a khap hnukkhu, hnin sari touh loum pawiteh a thoung han.

²⁹ Ataroe hnin vah, bakhu kahni touh thoseh, âbakhu kahni touh thoseh, buetbuet touh kamkhuengnae lukkareiim takhang koe, vaihma koevah a thokhai han.

³⁰ Vaihma ni yon thueng nahanelah buet touh, hmaisawi thueng nahanelah buet touh a thueng vaiteh, kampheng nah kathounghohe napui hanelah BAWIPA hmalah yonthanae a sak pouh han.

³¹ Hottelah, Isarel miphunnaw ni ahnimouh koe kaawm e Kaie lukkareiim a khin sak awh teh, a thounghoehnae dawk a due awh hoeh nahanlah a kamthoung awh han.

³² Hete phung teh tak dawk hoi lacip ka tâcawt e, a yangtui ka tâcawt ni teh kakhin e tami, ka kampheng e napui,

³³ Napui tongpa o inae dawk tarawi hane kawi phung doeh atipouh.

16

Kâmaiawinae hnin

¹ Aron e capa roi ni BAWIPA hmalah thuengnae a sak teh a due roi hnukkhu, BAWIPA ni Mosi koe a dei pouh e teh,

² Na hmau Aron ni a due hoeh nahanelah, hmuen kathoung dawk thingkong van, lungmanae tungkhung hmalah nâtuek hai kâen sak hanh. Kai teh thingkong van, lungmanae

tungkhung hmalah tâmai dawk hoi ka kamnue han.

³ Aron ni lukkarei hmuen kathoung thung bangtelah hoi maw a kâen han tetpawiteh, yon thueng nahanelah, a kum kanaw e maitotan buet touh, hmaisawi thueng nahanelah tutan buet touh a thokhai han.

⁴ Kathunge lukkarei angki hoi hna a khohna vaiteh lukkarei taisawm a kâyeng han. Lukkarei lupawk hai a pawk han. Hote khohnanaw teh a thoung dawkvah, tui a kamhluk hnukkhu a khohna han.

⁵ Isarel miphun tamimaya naw koe e, yon thueng nahanelah hmaeca kahni touh, hmaisawi thueng nahanelah tu buet touh a la han.

⁶ Aron ni amae yon thueng nahanelah maito a thueng vaiteh, ama hoi a imthungkhunaw hanelah yonthanae a sak han.

⁷ Hmae kahni touh hai a thokhai vaiteh, kamkhuengnae lukkareiim takhang koe, Cathut hmalah a poe han.

⁸ Aron ni hmae kahni touh hane kong dawk cungpam a rayu han. Buet touh e Cathut hanelah a rayu vaiteh, bout touh e teh kahrawngum tha hanelah a rayu han.

⁹ Cathut e cungpam lah a rayu e hmae teh Aron ni a la vaiteh yon thueng nahanelah a thueng han.

¹⁰ Tha hanelah cungpam a rayu e hmae teh a hring lahoi Cathut hmalah a poe vaiteh, a lathueng yonthanae a sak hnukkhu, kahrawngum a nganae koe a tha han.

¹¹ Aron ni amae yon thueng nahanelah maito

a thokhai hnukkhu, ama hoi a imthungkhunaw hanelah yonthanae a sak vaiteh, amae yon thuengnae maito a thei han.

¹² Cathut hmalah khoungroe hmaisaan hoi kakawi e tongben buet touh a la vaiteh, kanui lah phawm e hmuitui kutvang touh hoi, lukkarei yap e athunglah käenkhai han.

¹³ Aron ni duenae dawk hoi a hlout na hanelah hmuitui e hmaikhu ni lawkpanuesaknae thingkong khuem hmuitui sak hanelah BAWIPA hmalah hmuitui van a phuen han.

¹⁴ Maito thi youn touh a la vaiteh, Kanîtholah thingkong khuem van a kutdawn hoi a kahei han. Thingkong khuem a hmalah hai vai sari touh a kutdawn hoi a kahei han.

¹⁵ Hathnukkhu, taminaw hanelah yon thuengnae hmae a thei vaiteh, a thi hah lukkarei yap e athunglah a käenkhai hnukkhu, maito thi a kahei e patetlah thingkong khuem van thoseh, a hmalah hai thoseh, a kahei han.

¹⁶ Isarel miphunnaw e thounghoehnue yon dawk thoseh, kâtapoena yon pueng dawk thoseh, hmuен kathoung hanelah yonthanae a sak han. Hottelah, Isarel miphunnaw thounghoehnue yon thung kaawm e naw kamkhuengnae lukkareim hanelah a sak han.

¹⁷ Hmuен kathoung koe yonthanae sak hanelah, a käen nah, ama hanelah a imthungnaw hanelah, Isarel miphun abuemlah hanelah, yonthanae a sak teh, a tâco hoehroukrak kamkhuengnae lukkareim thung apihai awm mahoeh.

¹⁸ BAWIPA hmalah khoungroe koe bout a tâco

vaiteh, yonthanae a sak hanelah, maito thi, hmae thi, a la vaiteh khuungroe kinaw dawk a hlun han.

¹⁹ Thuengnae khuungroe van hai hote thi hah a kudawn hoi vai sari touh a kahei vaiteh, Isarel miphunnaw e thounghoehnae a thoung sak han.

²⁰ Hottelah, hmuen kathoung hanelah, kamkhuengnae lukkareiim hanelah, khuungroe hanelah, yonthanae a sak hnukkhu, hmae a hring lah a thokhai han.

²¹ Aron ni kahrung e hmae lû van a kut kahni touh hoi a tounghaiteh, Isarel miphunnaw e yonnae naw hoi a sakpayonnae pueng yonpâpho vaiteh, hmae lû van a tounghaiteh hnukkhu, a rawi e tami buet touh ni kahrung a ceikhai han.

²² Ahnimae yonnae pueng tami ohoehnae hmuen koe ka cetkhai e hote hmae hah kahrung a tha han.

²³ Aron ni kamkhuengnae lukkareiim thung bout a kâen vaiteh, hmuen kathoung koe apasuek a kâen navah, a kho e loukloukkaang e khohna a kho e hah a rading vaiteh, hmuen kathoung koe a ta han.

²⁴ Hmuen kathoung koe tui a kamhluk vaiteh amae khohna a khohna hnukkhu, bout a tâco vaiteh, Ama hoi taminaw hanelah hmaisawi thuengnae sathei hah a thueng vaiteh, Ama hoi ayânaw hanelah yonthanae a sak han.

²⁵ Yon thuengnae sathei thaw teh khuungroe van vah hmai a sawi han.

²⁶ Kahrung hmae ka tha e tami hai amae khohna a pâsu vaiteh tui a kamhluk hnukkhu, a

onae rim dawk bout a kâen han.

²⁷ Yon thuengnae maito hoi yon thuengnae hmae thi yonthanae sak hanelah hmuen kathoung koe kâenkhai e hah rim alawilah a ceikhai han. A pho, a moi, hoi a ei hah hmaisawi han.

²⁸ Hmai ka sawi e tami hai amae khohna a pâsu vaiteh, tui a kamhluk han. Hathnukkhu, roenae rim koe a cei han.

²⁹ Nangmouh ni na tarawi awh hane phung teh Isarelnaw thoseh, nangmouh koe kaawm e imyinnaw thoseh, Asari e thapa, hnin hra hnin vah, thaw na tawk awh mahoe. Na kâhat awh han.

³⁰ Bangkongtetpawiteh, BAWIPA hmalah nangmanaw yonnae pueng dawk hoi na thoung awh nahanelah, hote hnin dawk vaihma ni nangmouh na thoung a nahanelah yonthanae a sak han.

³¹ Hote hnin teh nangmouh na kâhat nahanelah sabbath hnin lah ao dawkvah duem na kâhat awh han.

³² A na pa e yueng lah vaihma thaw ka tawk hanelah, apasueke vaihma kut dawk hoi satui awi lah kaawm e tami ni yonthanae a sak han. Hote vaihma teh kathounge lukkarei khohna a khohna han.

³³ Hmuen kathoung hanelah, kamkhuengnae lukkareiim hanelah, khoungroe hanelah, vaihmanaw hanelah, tami pueng hanelah yonthanae a sak han.

³⁴ Hete phung teh Isarel miphunnaw ni a yonnae kaawm pueng dawk, kum touh dawk vai touh, yonthanae sak hanelah, nangmouh ni pou

na tarawi a hanelah, kâpoe e lah ao telah Cathut ni Mosi koe lawkthui e patetlah Aron ni a sak.

17

Thuengnae hmuen

¹ BAWIPA ni Mosi koe,

² Nang ni Aron hoi a capa, Isarel miphunnaw koe bout na dei pouh han e teh,

³ Isarel miphun dawk e tami buetbuet touh ni tu, hmae maito hah rim thung a thei nakunghai thoseh, rim alawilah a thei nakunghai thoseh,

⁴ Cathut e lukkareiim hmalah, Cathut koe thuengnae sak hanelah, kamkhuengnae lukkareiim takhang koe thokhai hoehpawiteh, hote tami teh hringnae a thei dawk a yon telah pouk han. Thi ka palawng e hote tami teh a miphun dawk hoi takhoe lah ao han.

⁵ Isarel miphunnaw ni kahrawng um vah thueng e satheinaw hah kamkhuengnae lukkareiim takhang hmalah, Cathut koe vahma hmalah a thokhai vaiteh, roum thuengnae a sak han.

⁶ Vahma ni hote sathei thi hah tamimaya kamkhuengnae takhang teng e khuongroe van a kahei vaiteh, athaw hai Cathut koe hmuitui hanlah hmai a sawi han.

⁷ Ahnimouh ni apasueke a kâyo awh e patetlah hmalah kahraituilinaw koe thuengnae bout sak awh mahoe. Hete kâlawk teh ahnimae miphun catounnaw ditouh a tarawi hane kâlawk lah ao.

8 Isarel miphun thoseh, nangmouh koe kho ka sak e louke miphun thoseh, hmaisawi thuengnae hoehpawiteh, louke sathei buetbuet touh, a thueng navah,

9 BAWIPA koe thuengnae a sak han navah, kamkhuengnae lukkareiim takhang koe a thokhai hoehpawiteh, hote tami teh a miphun dawk hoi na takhoe awh han telah ahnimouh koe na dei pouh awh han.

Thi ca cakânae

10 Isarel miphunnaw na hoehpawiteh, nangmouh koe kho ka sak e louke miphunnaw, buetbuet touh ni thi cat pawiteh, hote tami teh kai ni ka maithoe vaiteh a miphun dawk hoi ka takhoe han.

11 Bangkongtetpawiteh, tak hringnae teh thi dawk doeh ao. Nangmae na sak e yontha nahanelah, hote thi hah nang koe thuengnae khuungroe van ka poe toe. Tami e yon katha thai e teh thi doeh.

12 Hatdawkvah, nangmouh dawk apihai thi na cat awh mahoeh. Nangmouh koe kho ka sak e louke miphunnaw hai thi cat awh mahoeh telah Isarel miphunnaw koe Kai ni kâ ka poe.

13 Isarel miphunnaw hoehpawiteh nangmouh koe kho ka sak e louke miphunnaw buetbuet touh ni a hrampa teh ca hanelah moithang tava man pawiteh, thi a palawng vaiteh talai hoi a paten han.

14 Thi teh moithang pueng e hringnae lah ao. Hatdawkvah, nangmouh ni moithang buetbuet touh e thi na cat awh mahoeh telah Isarel miphunnaw koe kâ ka poe. Moithangnaw pueng

ni a hringnae teh thi dawk ao dawkvah, thi ka cat e tami teh takhoe roeroe lah ao han.

¹⁵ Amahmawk kadout e saring, sarang ni a kei e caha ka cat e, mae miphun, alouke miphun thoseh, amae khohna a pâsu vaiteh tui a kamhluk han. Tangmin totouh kathounghoehe lah ao.

¹⁶ Khohna pâsu hoeh, tui hai kamhluk hoeh-pawiteh amae a yonnae ama ni a khang han telah BAWIPA ni ati.

18

Kamsoumhoehe napui tongpa yon cakânae

¹ BAWIPA ni Mosi koe,

² nang ni patuen na dei pouh hane teh, Kai teh nangmae BAWIPA Cathut lah ka o.

³ Nangmouh ni ouk na onae Izip ram e nuencang thoseh, nangmouh na kâen khai nahane ram Kanaan ram e a nuencang thoseh, nangmouh ni na tarawi awh mahoe. Ahnimae lamthung hai na dawn awh mahoe.

⁴ Kai ni kâ na poe e patetlah na tarawi awh vaiteh, Kaie ka phunglam dawk na hring awh han. Kai teh nangmae Cathut Jehovah lah ka o.

⁵ Hatdawkvah, Kaie ka phunglamnaw hah tarawi awh. Hote phung ka tarawi e tami teh hote phung lahoi a hring han. Kai teh BAWIPA doeh.

⁶ Nangmouh thung dawk apihai ama hoi kâhnai e tami yonkhai mahoe. Kai teh BAWIPA doeh.

⁷ Nange na pa hoi kâkuen e na manu na ipkhai mahoeħ. Na manu lah ao dawkvah na yonkhai mahoeħ.

⁸ Na pa e yu koe na hnai mahoeħ. Na pa hoi kâkuen e lah ao.

⁹ Im touh dawk rei khe e thoseh, alouke kho dawk khe e thoseh, na tawncanu na ipkhai mahoeħ.

¹⁰ Na minca na ipkhai mahoeħ.

¹¹ Manu Alouklouk ei teh, na pa buet touh e na tawncanu na ipkhai mahoeħ.

¹² Na mani thoseh,

¹³ na manta thoseh,

¹⁴ na pa e hmaunawngħa hoi kâkuen e a yuca hai thoseh,

¹⁵ na capa e a yu, na langa hai thoseh,

¹⁶ hmaunawngħa hoi dueng kâkuen e na hmaunawngħa e a yu hai thoseh, na ipkhai mahoeħ.

¹⁷ Na yu hoi kâhnai lah kaawm e na yu e canu, na yu e minca na ipkhai mahoeħ. Hot patet hateħ, kahawihoeħe hno doeħ.

¹⁸ Na yu a hring navah, runae na poe hoeh nahanlah a nawngħa na lat mahoeħ.

¹⁹ Na yu a kampheng laħun nah na ipkhai mahoeħ.

²⁰ Ayâ yu na yonkhai mahoeħ. Ayâ yu yonkhainae teh mahoima kâkhinsaknae doeħ.

²¹ Na canaw hah Molek koe thuengnae laħ na sak mahoeħ. Na Cathut e min na pathoe mahoeħ. Kai teh BAWIPA doeħ.

²² Napui hoi rei na i e patetlah tongpa hoi rei na ip mahoeħ.

²³ Panuetkatho e hno doeh. Ma kâkhinsaknae doeh. Saring na ka ipkhai mahoe. Napui hai thoseh, saring hoi na ip sak mahoe. Panuetkatho e lah ao.

²⁴ Hot patet e hno hoi namamouh hoi namamouh na kâkhinsak awh mahoe. Bangkongtetpawiteh, hete hno a sak awh kecu dawk, nangmae hmalah ka takhoe e miphunnaw ni hottelah a sak awh teh a khin awh toe.

²⁵ Ahnimae ram hai a khin. A khin kecu dawk Kai ni ka toun awh teh hote ram ni amae canaw a palo awh han.

²⁶ Nangmouh teh Kai ni ka dei e phunglamnaw hah na tarawi awh han.

²⁷ Hote ram ni hmaloe kaawm e miphunnaw a palo e patetlah bout na khin awh vaiteh, na palo awh hoeh nahanelah ram thung e tami thoseh, nangmouh koe kho ka sak e alouke miphunnaw thoseh, hot patet e panuettho e na sak awh mahoe.

²⁸ Hot patet e hno panuettho e saknae lahoi ahnimae ram teh a khin toe.

²⁹ Hot patet e hno panuettho e ka sak e tami teh a miphun dawk hoi takhoe lah ao han.

³⁰ Hatdawkvah, hmaloe a sak a e panuettho e singyoe, nangmouh ni dawn laihoi na kâkhinsak awh hoeh nahanelah, kâlawk tarawi awh. Kai teh nangmae BAWIPA Cathut doeh telah ati.

19

BAWIPA teh a thoung

¹ BAWIPA ni Mosi koe,

² Nang ni Isarel miphun, rangpuinaw koe bout na dei pouh hane teh, nangmae BAWIPA, Kai teh

kathounge patetlah nangmouh hai thoung van awh.

³ Tami pueng ni na manu hoi na pa na bari awh han. Kaie sabbath hnin hai na ya awh han. Kai teh nangmae BAWIPA Cathut doeh.

⁴ Kutsak na bawk awh mahoe. Ma hanelah hlun e cathutnaw na sak awh mahoe. Kai teh nangmae BAWIPA Cathut doeh.

⁵ Roum thuengnae sathei BAWIPA koe thuengnae na sak pawiteh, BAWIPA lung ka youk lah na thueng awh han.

⁶ Thuengnae hnin hoi atangtho hnin dawk na ca awh han. Cawi pawiteh, a tawkkahnin teh hmai na sawi awh han.

⁷ Tawkkahnin dawk yitca nakunghai na cat awh pawiteh, panuettho e lah ao. Lungyouk lah awm mahoe.

⁸ Ka cat e tami teh BAWIPA thoungnae a khinsak dawkvah, a yonnae phu teh ama ni a khang han. Hote tami teh a miphun dawk hoi takhoe lah ao han.

Namahoima patetlah na imri lungpataw

⁹ Na law dawk e cang na a torei teh, lawrai lae koung na a awh mahoe. Cabong bout na hrawm a torei hai na pahnim a e bout na hrawm awh mahoe.

¹⁰ Misur paw hai koung na khi awh mahoe. Kacawie a paw bout na khi awh mahoe. Hote a paw teh, kamathoe e tami, hoi imyinnaw hanelah, na pek awh han. Kai teh nangmae BAWIPA Cathut doeh.

¹¹ Ayâ e hno na parawt awh mahoe. Ayâ na dum awh mahoe. Buetbuet touh laithoe na kâdei awh mahoe.

¹² Kaie min lahoi kahmanhoeh lah thoe na ka bo awh mahoeh. Na Cathut e min mathout sak awh hanh. Kai teh BAWIPA doeh.

¹³ Na imri e hno kamsoum hoeh lahoi lawm hanh. Thama lahoi lat pouh hanh. Counnae phu hah karum loum sak hanh.

¹⁴ Hnâpang thoe na bo mahoeh. Midawn hmalah kamthui kawi hno na tat pouh mahoeh. Na Cathut hah barih. Kai teh BAWIPA doeh.

¹⁵ Lawkcengnae koe kamsoum hoeh lah lawk na ceng mahoeh. Kamathoe e noutna laipalah awm hanh. Athakaawme tami minhmai khen hanh. Na imri hah kamsoum lah lawk na ceng han.

¹⁶ Ayânaw minhmai mathoenae kamthang hah dei hanelah na taminaw koe na kâhlai mahoeh. Na imri runae kâhmo sak hanlah na kâcái mahoeh. Kai teh BAWIPA doeh.

¹⁷ Na lung thung hoi na hmaunawngħha hmuh-manae na tawn mahoeh. Na imri a payonnae hah pak khen laipalah na yue katang han.

¹⁸ Na taminaw ni nang koe payon awh pawiteh, bout pathung hanh. A yonnae hah pâkuem pouh hanh. Na imri hah nama patetlah lungpataw. Kai teh BAWIPA doeh.

Kaie cangkhainae na tarawi han

¹⁹ Kaie phunglawk na tarawi awh han. Aphun alouklouk e saring a napui, a na tongpa âvâ na yawng sak mahoeh. Cati alouklouk e mak kâkalawt lah law dawk na patue awh mahoeh. Pahla hoi tumuen carouk teh kawng e khohna na khohnat awh mahoeh.

²⁰ Paluen hanelah sut ham teh ratang hoeh rae a sannu ka ipkhai e tami teh hemnae a khang

han. Hote napui teh amae san lah ao dawkvah thei lah awm mahoeħ.

²¹ Tongpa ni hai kâtapoe thueng nahanelah, tutan buet touh kamkhuengnae lukkareiim takhang koe BAWIPA koeħah a thokħai han.

²² Hote tongpa ni a sakpayon e yontha nahanelah, kâtapoe thuengnae tutan hah, vaihma ni BAWIPA hmalah a thueng han. Hote tongpa teh yon ngaithoum lah ao han.

²³ Nangmouh koe Kai ni na poe e ram dawk na pha awħ toteħ, cakawi thingħħai aphonphun na ung awħ hnukkhu, kum thum touħ thung kapaw e a pawnaw hah, vuensoma hoeh e a paw telah na pouk awħ vaiteħ, na cat awħ mahoeħ.

²⁴ A kum palinae kapaw e a paw pueng teh a thoug dawkvah BAWIPA pholen nahanelah pasoum lah ao.

²⁵ A kum panganae a pawnaw hah na ca awħ han. Hottelah na sak pawiteħ thingħainaw hoe a paw han. Kai teh nangmae BAWIPA Cathut lah ka o.

²⁶ A thi hoi bangpatet e a moi hai mek na cat awħ mahoeħ. Tami na ān mahoeħ. Kut na khet hoi khueyue lawk na dei mahoeħ.

²⁷ Na lû kâkalup lah na sam na ngaw mahoeħ. Pâkhamuen na ngaw mahoeħ.

²⁸ Kadout e tami hanelah na tak na a mahoeħ. Mangkâkhuinae na sak mahoeħ. Kai teh BAWIPA doeh.

²⁹ Na canu kâyawt sak hanh. Hoehpawiteħ ram ni kâyawt e koe kâbang vaiteħ, kahawihoeħe hno hoi akawi han.

³⁰ Sabbath hnin hah na ya han. Kai teħ hnin kathoung hah na bari han. Kai teh BAWIPA doeh.

³¹ Nama hoi nama kâkhinsak hanelah kahrai khueyue koe, kamlang hanh. Hmaui hai tawng aw h hanh. Kai teh nangmae BAWIPA Cathut doeh.

³² Sam ka po e hmalah kangdout nateh, matawng e minhmai na bari han. Na Cathut hah na taki han. Kai teh BAWIPA doeh.

³³ Nangmouh koe kârayen e imyin hah na rektap mahoeh.

³⁴ Nangmouh koe kârayen e imyin hah na tami patetlah na pouk han. Nama patetlah na lungpataw han. Nangmouh teh Izip ram vah imyin lah ouk na o aw h toe. Kai teh nangmae BAWIPA Cathut doeh.

³⁵ Bangnuenae, Khingnae, tonae dawkvah kamsoum hoeh lah na sak mahoeh.

³⁶ Kahman e yawcu, khinglung, Kahman e ephah, kahman e hinnaw hah na hno han. Kai teh Izip ram hoi nangmouh ka tâcawtkhai e nangmae BAWIPA Cathut lah ka o.

³⁷ Kaie phunglamnaw puenghoi lawk tâtueng e naw pueng hah na tarawi aw h han. Kai teh BAWIPA doeh telah ati.

20

Camo thueng reknae

¹ BAWIPA ni Mosi koe, nang ni Isarel miphun-naw koe bout na dei pouh hane teh,

² Isarel taminaw thoseh, Isarelnaw koe kho ka sak e alouke miphunnaw thoseh, amae canaw Molek koe, ka poe e tami teh thei roeroe han. Khocanaw ni talung hoi a dei aw h han.

³ Kaie hmuen kathoung kakhin sak niteh, Ka min kathoung kamathout sak niteh, amae canaw Molek koe ka poe e tami teh, Kai ni mithmaithung sin vaiteh, a miphun dawk hoi ka takhoe han.

⁴ Amae canaw Molek koe ka poe e tami hah, khocanaw ni nout laipalah thet awh hoeh pawiteh,

⁵ Hottelah kaawm e tami hoi a imthungkhanaw hah, Kai ni mithmaithung sin vaiteh, ahni hai thoseh, ahni hoi cungtalah Molek koe, ka kâyawtnaw hai thoseh, ahnimae miphun dawk hoi ka takhoe han.

⁶ Lam ka phen ni teh kahrai khueyue koe kamlang e taminaw hoi camkathouumnaw koe kâyawt e naw hah, mithmaithung sin vaiteh, a miphun dawk hoi ka takhoe han.

⁷ Nangmae BAWIPA KAI Cathut teh kathoung dawkvah nangmouh hai kâthoung sak awh nateh, kathoung lah awm awh.

⁸ Kaie ka phunglamnaw hah na tarawi awh han. Kai teh BAWIPA, nangmouh na kathoung sak e BAWIPA doeh.

⁹ Apipatethai a manu, hoi a na pa thoe ka bo e tami pueng teh, thei roeroe lah ao han. A manu hoi a na pa thoe a bo dawkvah, a thi phu teh amae lû dawk a bo han.

Kamsoumhoehe napui tongpa yon reknae

¹⁰ Ayâ yu yonkhai pawiteh, ka uicuk e napui hoi tongpa hah mek thei lah ao han.

¹¹ Apihai a na pa e yu yonkhai pawiteh, a na pa kaya sak e lah ao dawkvah, hote napui hoi

tongpa mek thei lah ao han. Ahnimae thi phu teh amae lû dawk a bo han.

¹² Apihai amae langa ipkhai pawiteh, ahnimouh roi panuettho e hno hah a sak dawkvah, mek thei lah ao han.

¹³ Apihai napui ikhai e patetlah tongpa reira ipkhai pawiteh, ahnimouh roi teh panuettho e hno a sak roi dawkvah, mek thei lah ao han. Ahnimouh roi e thi phu teh amamouh roi dawk a bo han.

¹⁴ Apihai a manu hoi canu a yu lah mek lat pawiteh, Hot teh, kahawihoehe hno doeh. Nangmouh koevah kahawihoehe hno ao hoeh nahanelah, ahnimanaaw teh hmai na sawi awh han.

¹⁵ Apihai saring ipkhai pawiteh, ahni teh thei lah ao han. Hote saring hai thei lah ao han.

¹⁶ Napui ni saring koe kâ ipkhai sak pawiteh, hote napui hoi saring teh mek thei lah ao han. Ahnie thi phu teh amae lû dawk a bo han.

¹⁷ Tongpa ni a tawncanu, a na pa e canu, na hoehpawiteh, a manu e canu a yu lah a paluen teh ipkhai pawiteh, hot hateh, kamsoumhoehe hno doeh. Ahnimouh roi teh a taminaw e hmaitung hoi takhoe lah ao han. Hote tongpa teh amae tawncanu a okhai dawkvah a yonnae phu ama ni a khang han.

¹⁸ Tongpa ni kampheng lahun e napui ipkhai pawiteh, thi palawng hanlah a lungkuep roi dawkvah, ahnimouh roi teh a miphun dawk hoi takhoe lah ao han.

¹⁹ Na mani hoi na manta na ipkhai mahoe. Hottelah, kâhnai e imthung hoi ka ipawm e tami teh amamae yonnae a khang han.

²⁰ Tongpa ni a na pa e hmaunawngha yu ipkhai pawiteh, a na pa e hmaunawngha hoi dueng kâkuen e a ikhai dawkvah, ahnimouh teh amae yon phu teh amae lû dawk a bo han. Carôe laihoi a due han.

21 Tami ni a hmaunawngħha e yu ipkhai paw-iteh, kakhin e hno lah ao. A hmaunawngħha hoi dueng kākuen e a ikhai dawkvah, ahnimouh teh-carōe lahoi a due han.

22 Kai ni nangmouh na hrawi awh teh, kho na sak hane ram ni na palo awh hoeh nahanelah, Kaie phunglawknaw pueng na tarawi awh han.

²³ Nangmae hmalah ka takhoe e miphunnaw e singyoee hah na tarawi awh mahoe. Ahni-manaw ni hot patet e hno a sak awh dawkvah ka panuet.

²⁴ Ahnimae ram lah kaawm e sanutui hoi khoitui a lawngnae ram hah, nangmouh ni raw lah na coe awh hanelah, Kai ni khoeroe na poe awh han telah Kai ni kâ na poe awh toe. Kai teh alouke miphunnaw hoi nangmouh na kapek e nangmae BAWIPA Cathut lah ka o.

25 Hatdawkvah, kathounge moi,
kathounghoeh moi, kathounge tava,
kathounghoeh tavanaw hah na kapek han. Kai
ni kapek e patetlah Kathounghoeh moi, tava,
talai dawk a von hoi kâva e saring buetbuet touh
lahoi namahoima kâkhinsak awh hanh.

26 Kai Cathut, kathoung dawkvah nangmouh na panki teh Jentelnaw hoi na kapek dawkvah, Kai hanelah na kâthoung awh han.

²⁷ Tongpa thoseh, napui thoseh, kahrai khueyue, camkathoum lah kaawm e tami teh

thei roeroe lah ao han. Hot patet e tami teh, talung hoi dei lah ao han. Amae thi phu amae lû dawk a bo han.

21

Thoungnae hoi Vaihmanaw

¹ Cathut ni Mosi koe, nang ni Aron capa, vaihmanaw koe bout na dei pouh hane teh, na miphunnaw duenae dawk apihai na kâkhinsak awh mahoech.

² Hateiteh, kahnai poung e manu napa, canaw, hmaunawngah,

³ Vâ ka tawn hoeh rae na tawncanu hanelah, khin thainae kâ a tawn.

⁴ Na tami khobawinaw hanelah kâkhinsak hanelah awm hoeh.

⁵ Vaihma teh lû hoi pâkhamuen ngaw mahoech. Atak hai kâbouk mahoech.

⁶ Ahni teh amamae Cathut hanelah a thoung han. Na Cathut e min mathout sak awh hanh. Cathut e canei a thueng awh dawkvah, a thoung han.

⁷ Ahni teh kâyawt e napui, a nuencang kahaw-ihoehe napui, vâ hoi kamphei e napui hoi na kâyuva mahoech. Bangkongtetpawiteh, vaihma teh Cathut hanelah kâthoung e lah ao.

⁸ Vaihma teh na Cathut e vaiyei ka poe e lah ao dawkvah, amahoima kâthoung naseh. Nangmouh na kathoung sak e Kai BAWIPA teh kathoung dawkvah, ahni hai nangmouh hanlah kâthoung naseh.

⁹ Vaihma e canu ni amae tak a kâyo teh amahoima min mathoenae sak pawiteh, a na pa

min kamathout sak e lah ao. Ahni teh hmai hoi sawi lah ao han.

¹⁰ Hmaunawngtha thung dawk vahma kacue lah rawi teh, a lû dawk satui awi lah kaawm e teh, a khohna ravek hanh naseh. A lû dawk e lupawk rading hanh naseh.

¹¹ Ro koe cet hanh naseh. A manu hoi a na pa hanelah kathounghoehe lah awm hanh naseh.

¹² Hmuen kathoung koehoi tâcawt mahoe. Amae Cathut e hmuen kathoung khin sak mahoe. Bangkongtetpawiteh, amae Cathut ni rawinae satui ahni dawk ao toe. Kai teh BAWIPA doeh.

¹³ Tanglakacuem duengdoeh a yu lah a la han.

¹⁴ Lahmai thoseh, Ma e napui thoseh, Min mathoe ka phawt e napui thoseh, kâyawt e napui thoseh, yu lah lat mahoe. A miphun dawk e tanglakacuem dueng hah a la han.

¹⁵ Amae capa hah a taminaw koe min mathout sak mahoe. Kai Cathut teh ahnimanaw kathoung sak e doeh telah ati.

¹⁶ BAWIPA ni Mosi koe, nang ni Aron koe bout na dei pouh hane teh,

¹⁷ Na miphunnaw, catounnaw dawk yon ka tawn e tami teh vaiyei thueng hanelah tho hanh naseh.

¹⁸ Mitedawn, khokkhem, a hnawng ka uek e, a kutkhok hlois kasaw e taminaw,

¹⁹ kut ka lawt e, a khok ka lawt e,

²⁰ Hnamkhun, rahnoum, mitmawm, raipha, ngavangrawca, yangmukhe e taminaw teh bawk mahoe.

²¹ Vaihma Aron phun dawk e ka kuepcing hoeh e tami buet touh ni boehai hmaisawi thuengnae

hah hnai mahoe. Tak ka kuepcing hoeh e lah ao dawkvah, vaiyei poe hanelah hnai mahoe.

²² Kathounge vaiyei thoseh, kathoungpounge vaiyei thoseh, amae Cathut e vaiyei teh a ca han.

²³ Tak ka kuepcing hoeh dawkvah, hni yap e thung thoseh, thuengnae khoungroe thoseh, cet aw h mahoe. Telah hoehpawiteh, Kaie hmuen kathoung khin payon vaih. Kai BAWIPA ni hote hmuenaw teh kathoung sak toe ati.

²⁴ Hottelah, Mosi ni Aron hoi capanaw, Isarel miphunnaw pueng koe patuen a dei pouh.

22

¹ BAWIPA ni Mosi koe bout a dei pouh e teh,

² Aron hoi capanaw ni kai hanelah thoung sak laihoi ka min mathoe hoeh hanelah, Isarel miphunnaw e kathounge hnonaw hoi amamouh hoi kâhla sak hanlah dei pouh. Kai teh BAWIPA doeh.

³ BAWIPA hanelah Isarel miphunnaw thoung sak nateh, kathounge hnonaw hah, thoung laipalah ka hnai e vahmanaw teh, Kai koehoi takhoe lah ao han. Kai teh BAWIPA doeh.

⁴ Ka hrikbei e hoi lacip patawnae ka tawn e Aron e capanaw teh, a thoung aw h hoehroukrak kathounge hno cat aw h mahoe. Ro hoi kâkuen lah kathounghohe hno ka tek e tami, a yangtui ka tâcawt e tami,

⁵ Ama kakhin sak thai e, a von hoi ka kâva e saring ka tek e tami, khinnae buethuet touh hoi kâkhinsak e tami, hot patet e tami kâbet e taminaw teh,

⁶ Tangmin totouh kathounghoehe lah ao awh han. Tui kamhluk hoehpawiteh kathoung cat mahoeh.

⁷ Kanî a khup hoi teh kathoung lah ao toungh dawkvah, Kathoung hno teh ahnimae rawca lah ao dawkvah bout a ca han.

⁸ Ama pouk kadout e saring, sarang ni a kei e caha cat mahoeh. Kai teh BAWIPA doeh.

⁹ Vaihmanaw ni ka phunglam a raphoe awh teh, a yonnae kecu dawk a due awh hoeh nahanelah, Kaie phunglam a tarawi awh han. Kai teh nangmouh kathoung sak e BAWIPA doeh.

¹⁰ Alawilae tami ni kathoung hno poe e hah, cat mahoeh. Vaihma im ka luen e imyin ni cat mahoeh. Thaw tawk hanlah hlai e tami ni hai cat mahoeh.

¹¹ Vaihma ni phoisa hoi a ran e tami, a kawk e taminaw ni hote rawca teh a ca han.

¹² Vaihma canu teh alawilae tami ni a yu lah lat pawiteh, kathoung hno poe e hah cat mahoeh.

¹³ Hateiteh, a vâ a due nakunghai thoseh, a vâ hoi kamphei nakunghai thoseh, ca khe laipalah a na pa im bout a ban teh a nawnae patetlah bout awm pawiteh, a na pa ni a ca e bout a ca han. Alawilae tami ni cat mahoeh.

¹⁴ Tami ni kathoung hno panuek laipalah cat payon pawiteh, ca payonnae hno phu hoi pung panga touh dawk pung touh vaihma koe bout a sin han.

¹⁵ Isarel miphunnaw ni BAWIPA koe poe e kathoung hnonaw hah, khin sak mahoeh.

¹⁶ Hote hnonaw ka cat payon ni teh sak payonnae yon teh amamouh ni a khang han. Bangkongtetpawiteh, Kai teh nangmouh

kathoung sak e BAWIPA doeh.

Dâw kawi e thuengnae

¹⁷ BAWIPA ni Mosi koe, nang ni Aron hoi a canaw, Isarelnaw pueng koe patuen na dei pouh han e teh,

¹⁸ Isarel miphun thoseh, Isarelnaw koe kho ka sak e Jentelnaw thoseh, lawkkam e lahoi poe e hno, lungtho lahoi poe e hno lah kaawm e hmaisawi thuengnae Cathut koe thueng han na ngai pawiteh,

¹⁹ Cathut lungyouk nahanelah kacueme tu, hmae, hoi maitotannaw hah na poe awh han.

²⁰ Toun kaawm e saring na poe awh mahoe. Poe pawiteh Cathut ni a lungyouk mahoe.

²¹ Lawkkam e lahoi poe e, lungtho e lahoi poe e tu, hmae, hoi maitonaw hah BAWIPA koe roum thuengnae lah poe han na ngai pawiteh, a lungyouk thai nahanlah, akuepcing han. Toun han buet touh boehai awm han naseh.

²² A mit ka dawn e, A hru ka lawt e, a tak ka kuep hoeh e, a hmâ ka cat e, ka pâphu e, ka raipha e, hot patet e patawnae buet touh awm pawiteh, Cathut koe poe mahoe.

²³ Ma lungtho hoi poenae dawk teh, maito thoseh, tu thoseh, a takthai ka vout e lahoi poenae dawk teh hot patet e hah a lungyouk mahoe.

²⁴ A yangtuen buet touh ka khe e, hoehpawiteh, ka tangpawk e, hoehpawiteh phengcatai e teh Cathut koe poe mahoe. Nangmae ram thung hot patet e thuengnae na sak awh mahoe.

²⁵ Hot patet e saring hah Jentelnaw ni ka poe nakunghai toun ao dawkvah na Cathut e pawi

hanlah poe hanh naseh. Poe pawiteh a lungyouk mahoeħ telah ati.

²⁶ BAWIPA ni Mosi koe bout a dei pouh e teh,

²⁷ Tu, hmae hoi maito naw a khe navah, hnин sari touh thung a ca hoi a manu na papek awh mahoeħ. A hnин taroe hnин hoi doeh, BAWIPA koe hmai thuengnae hanlah a khout.

²⁸ Maito thoseh, tu hoi hmae thoseh, a manu hoi a ca hnин touh dawk mek na thet mahoeħ.

²⁹ Hahoi, BAWIPA koe lunghawilawkdeinae thuengnae poe hanlah na ngai pawiteh a lungyouk lah poe haw.

³⁰ Hnin touh hoi be na ca han. Atangtho ditouh na pek mahoeħ. Kai teh BAWIPA doeh.

³¹ Nangmouh ni kaie kāpoelawknaw na tarawi awh han. Kai teh BAWIPA doeh.

³² Ka min kathoung heh na khin sak awh mahoeħ. Isarelnaw ni BAWIPA a thoung telah a panue awh han.

³³ Kai teh nangmae Cathut lah ka o nahanlah, Izip ram hoi na ka tâċawt sakkung hoi na kathoung sakkung lah ka o. Kai teh BAWIPA doeh telah ati.

23

BAWIPA e Pawinaw

¹ BAWIPA ni Mosi koe, nang ni Isarelnaw koe bout na dei pouh hane teh,

² Nangmouh ni na sak e kathounge kamkhuengnae, Kai BAWIPA e pawinaw teh; Hnin taruk touh thung thaw na tawk awh han. Hnin sari hnин teh kāhatnae sabbath hnин, kathoung kamkhuengnae lah ao.

Sabbath

³ Hnin taruk touh thung thaw na tawk awh han. Hateiteh, hnin sari hnin teh kâhatnae, kamkhuengnae hnin kathoung lah ao dawkvah bang thaw haiyah na tawk awh mahoe, na onae pueng koevah BAWIPA hanlah sabbath hnin lah ao.

Ceitakhai

⁴ Ama tueng nah nangmouh ni na pathang awh hane kathoung kamkhuengnae lah kaawm e Cathut pawinaw teh;

⁵ Apasueke thapa, hnin hlaipali, tangmin nateh BAWIPA e ceitakhai pawi doeh.

⁶ Hote thapa, hnin hlaipanga hnin teh BAWIPA hanlah tonphuenhoehe pawi lah ao. Hnin sari touh thung tonphuenhoehe na ca awh han.

⁷ Apasuek hnin vah kathoung kamkhuengnae na sak awh han. Bang thaw hai na tawk awh mahoe.

⁸ Hateiteh, hnin sari touh thung BAWIPA koe rawca thuengnae na sak awh han. Asari hnin nah kathoung kamkhuengnae na sak han. Hat hnin nah, bang thaw hai na tawk mahoeh telah a ti.

Aluepaw

⁹ Cathut ni Mosi koe bout a dei pouh e teh, nang ni Isarel miphunnaw koe patuen na dei pouh hane teh;

¹⁰ Kai ni na poe e ram dawk na pha awh toteh, cang na a awh toteh, apasuek na a e cabong buet touh vaihma koe na thokhai awh han.

11 Nangmouh ni a lungyouk awh nahanlah vaihma ni sabbath hnin atangtho vah hote cabong hah Cathut hmalah a kahek han.

12 Cabong a kaheknae hnin dawkvah âvâ ka cawt hoeh rae tutanca hah BAWIPA hanlah hmaisawi thuengnae a sak han.

13 Hote thuengnae hoi ka kâkuen e tavai thuengnae teh Cathut koe hmuitui hanlah hmaisawi thuengnae lah kaawm e satui hoi kalawt e tavai ephah pung hra pung touh kalawt e lah ao han. Awi thuengnae teh misurtui buet touh han.

14 Na Cathut koe thuengnae hnin a pha hoehnahlan vah, vaiyei, vaicakuem karê e, anhla kahring a pawhik na cat awh mahoe. Hetteh, na onae hmuen pueng koe na catoun ditouh na tarawi hane phunglam lah ao.

A yat pawi

15 Kahek thuengnae cabong na thokhainae hnin, sabbath hnin atangtho hoi sabbath avai sari totouh na touk awh han.

16 Sabbath avai sarinae atangtho amom hoiyah hnin 50 touh na touk hnukkhu, Cathut koe tavai thuengnae a tha lah bout na sak han.

17 BAWIPA hanlah aluepaw, ton ni a po sak e tavai ephah pung hra pung hni hoi sak e kahek hane vaiyei kahni touh na im hoi na sin awh han.

18 Hote vaiyei hoi âvâ ka cawt hoeh rae tuca sari touh, maitotanca buet touh, hmae kahni touh, tavai thuengnae, awi thuengnae hoi cungtalah BAWIPA koe hmuitui nahanlah hmai hoi sawi e thuengnae lah kaawm e hmaisawi thuengnae sathei hah na thueng awh han.

19 Yon thuengnae lah hmaeca buet touh thoseh, roum thuengnae hanlah âvâ ka cawt hoeh rae tuca kahni touh thoseh, na thueng han.

20 Vaihma ni aluepaw, vaiyei hoi cungtalah a kahek vaiteh, tuca kahni touh a sin vaiteh BAWIPA hmalah kahek thuengnae a sak han. Hote hnonaw haiyah vaihma hanlah BAWIPA hmalah kathoung hno lah ao.

21 Hote hnin dawk kathoung kamkhuengnae hah na sak awh han. Thaw banghai na tawk awh mahoech. Na onae hmuen pueng koe na ca catoun ditouh na tarawi awh hane phunglawnk lah ao.

22 Na law dawk cang na a awh navah, lawri totouh koung na a awh mahoech. Cabong na pâhma e hah bout na racawng mahoech. Hotnaw teh karoedengnaw hoi imyinnaw hanlah na pek pouh han. Kai teh nangmae BAWIPA Cathut doeh telah a ti.

Mongka

23 BAWIPA ni Mosi koe, nang ni Isarel miphun-naw koe patuen bout na dei pouh hane teh,

24 Nangmouh ni tha sari, apasuek hnin nah mongka ueng pawi kathoung kamkhuengnae sabbath hnin hah na ya awh han.

25 Thaw na tawk awh mahoech. BAWIPA hanlah hmaisawi thuengnae na sak han telah a ti.

Rouumnae hnin

26 Cathut ni Mosi koe bout a dei e teh,

27 Tha sari, hnin hra navah, yonthanae hnin, kathoung kamkhuengnae saknae hnin lah ao. Khang laihoi BAWIPA hanlah hmaisawi thuengnae na sak awh han.

²⁸ Hote hnin dawk bang thaw hai na tawk mahoeh. Na BAWIPA Cathut hmalah yonthanae hnin lah ao.

²⁹ Hote hnin nah, ka ya hoeh e taminaw teh amae miphun dawk hoi takhoe lah ao han.

³⁰ Hote hnin dawk thaw buetbuet ka tawk e tami teh a miphun dawk hoi a takhoe vaiteh ka raphoe han.

³¹ Bang thaw hai na tawk awh mahoeh. Na onae hmuen pueng koe na ca catoun ditouh na tarawi awh hane phunglawk lah ao.

³² Hote hnin teh yanae hnin lah ao. Atako hnin tangmin lahoi atangtho tangmin ditouh na ya awh han.

³³ Cathut ni Mosi koe, nang ni Isarel miphunnaw koe patuen bout na dei pouh hane teh,

³⁴ Nangmouh ni tha sari, hnin hrahlaipanga hnin hoi hnin sari touh thung Cathut hanelah lukkarei pawi na sak awh han.

³⁵ Apasuek hnin dawk kathoung kamkhuengnae na sak awh han. Thaw na tawk awh mahoeh.

³⁶ Hnin sari touh thung BAWIPA koe hmaisawi thuengnae na sak awh han. A hnin taroe hnin haiyah, kathoung kamkhuengnae hoi BAWIPA koe hmaisawi thuengnae hah na sak awh han. Ka talue e kamkhuengnae lah ao dawkvah thaw na tawk awh mahoeh.

³⁷ Hotnaw teh, BAWIPA e sabbath hnin, BAWIPA koe pasoumhno,

³⁸ Lawkkamnae lahoi thuengnae, lungtho lahoi thuengnae hloilah hnin touh hoi hnin touh BAWIPA koe hmaisawi thuengnae, tavai thuengnae, sathei thuengnae hoi awi thuengnae naw

sak e lah kathoung kamkhuengnae, BAWIPA e pawinaw lah ao.

³⁹ Hotnaw hloilah, law dawk e caticamu pâkhueng hnukkhu, tha sari, hnin hrâhlipa pang hnин hoi hnin sari touh thung BAWIPA koe pawin na to awh han. Apasuek hnin hoi a taroe hnin vah sabbath na ya awh han.

⁴⁰ Apasuek hnin dawk a paw kahawihloe e, samtue kang hoi a hna karung e thingkangnaw hah a sin awh teh, Nangmae BAWIPA Cathut hmalah hnin sari touh thung na lunghawi sak awh.

⁴¹ Hote pawi hah kum kum touh dawk hnin sari touh thung Cathut hanlah na sak awh han. Na miphun na catoun ditouh tarawi hane kawi phunglawk lah ao.

⁴² Hote pawiteh thapa ayung sari nah na sak awh han.

⁴³ Isarel miphunnaw Izip ram hoi tâcokhai navah, thingkang rim dawk o saknae hah na miphun, na catounnaw ni a panue thai nahanelah, Isarelnaw teh thingkang rim dawk hnin sari touh ao han. Kai teh nangmae BAWIPA Cathut doeht a ti.

⁴⁴ Mosi ni hai BAWIPA e pawinaw hah Isarel miphunnaw koe na pathang pouh.

24

Hmaiimnaw

¹ BAWIPA ni Mosi koe bout a dei e teh,

² Rangpui kamkhuengnae lukkareiim dawk lawkpanuesaknae lukkarei yap e alawilah, hmaikhom dawk hmai pou a ang nahanlah, Olive

paw na phawm vaiteh, na lae olive satui hah Isarel miphunnaw ni nang koe thokhai hanelah patuen dei pouh.

³ Aron ni hai tangmin hoi amom totouh Cathut hmalah hote thaw a tawk han. Na miphun na catounnaw ditouh tarawi hane kâ poe e lah ao.

⁴ Kathounge hmaiimkhok dawk hmaiimnaw hah Cathut hmalah Aron ni pou a rakueng han.

Lukkareiim hanelah vaiyei

⁵ Nang ni tavai na la vaiteh, ephah pung hra pung hni touh e hah vaiyei buet touh lah, vaiyei hrahlaikahni touh na sak hnukkhu,

⁶ BAWIPA hmalah kathounge caboi van vah, vaiyei taruk taruk touh hoi pung hni telah na pacoung han.

⁷ BAWIPA koe hmaisawi thuengnae lah kaawm e pahnim hoeh nahanelah, hote vaiyei pung hni touh e van vah, kathounge frankinsen na ta han.

⁸ Cathut e lawkkam patetlah Isarelnaw e kut dawk hoi dâw e vaiyei hah, Aron ni Cathut hmalah sabbath hnintangkuem pou a rakueng han.

⁹ Hote vaiyei teh Aron hoi a canaw e lah ao dawkvah hmuen kathoung dawk a ca awh han. BAWIPA koe hmaisawi thuengnae thung dawk hote vaiyei teh a yungyoe phunglam patetlah Aron hanlah kathoungpoung lah ao telah a ti.

Pathoena

¹⁰ Hahoi Isarel napui e capa, a na pa teh Izip tami, Isarelnaw onae koe a cei teh, Isarel napui e capa hoi Isarel tami e capa teh roenae rim thung a kâyue roi.

11 Cathut e min a pacekpahlek teh thoe a bo. Ahnie a manu teh Dan miphun, dibri e canu Shelomith lah ao.

12 Ka payon e tami hah Mosi koe a thokhai awh teh, BAWIPA e ngainae a panue hoehroukrak a paung awh.

13 BAWIPA ni Mosi koe,

14 Thoe ka bo e tami hah rim alawilah a hrawi awh teh, ahnie lawk ka thai naw pueng ni a lû van kut a tound pouh hnukkhu, rangpuinaw ni talung hoi dei awh naseh.

15 Nang ni Isarel miphunnaw koe patuen na dei hane teh, Cathut thoe ka bo e tami teh ama ni a khang han.

16 Cathut e min ka pacekpahlek e tami teh thei roeroe lah ao han. Rangpuinaw ni hote tami hah talung hoi a dei katang awh han. A miphun thoseh, alouke miphun thoseh, a min pacekpahlek pawiteh thei lah ao han.

Mit hanelah mit

17 Tami ka thet e tami hai thei roeroe lah ao han.

18 Saring ka thet e tami hai katawnkung koe buet touh thet pawiteh buet touh aphi a rawng pouh awh han.

19 Tami ni a imri lungpataw sak pawiteh, ahni koe a sak e patetlah ama ni a khang han.

20 A hru hanlah a hru, mit hanlah mit, hâ hanlah hâ, ahni koe patawnae na sak e patetlah nama hai patawnae na khang han.

21 Saring ka thet e tami teh buet touh hanelah buet touh bout a poe han. Tami ka thet e tami teh thei lah ao han.

²² A miphun thoseh, alouke miphun thoseh, ama dueng lahoi lawkcengnae teh a khang han. Kai teh nangmae BAWIPA Cathut doeh telah Mosi koe atipouh.

²³ Thoe ka bo e tami teh rim alawilah a hrawi awh vaiteh talung hoi dei hanelah Mosi koe patuen a dei pouh teh, Cathut ni Mosi koe lawkthui e patetlah Isarel miphunnaw ni a sak awh.

25

Sabbath kum

¹ Sinai mon dawk, BAWIPA ni Mosi koe, nang ni Isarel miphunnaw koe patuen bout na dei pouh hane teh,

² Kai ni na poe e ram dawk na pha awh toteh, Hote ram ni BAWIPA hanlah sabbath ayâ han.

³ Kum taruk touh thung law hoi misur takha na sak awh vaiteh, apawhik na pâkhueng awh han.

⁴ Kum sarinae kum teh BAWIPA hanlah sabbath kum, ram thung kaawm e pueng kâhat vaiteh, sabbath yanae kum lah ao. Law na sak mahoech. Misur takha hai na rasoun mahoech.

⁵ Law dawk ama pouk kapâw e apawhik hai na khi mahoech. Na rasoun hoeh e misur hai na khi mahoech. Ram pueng kâhatnae kum lah ao.

⁶ Ram thung sabbath kum nah ka tâcawt e apawhik pueng teh namamouh, napui hoi tongpa, na thaw ka tawk e hoi, nang koe kaawm e imyinnaw hoi,

⁷ ram thung kaawm e saring pueng ni ca hane kawi lah ao han.

Jubili kum

⁸ Sabbath kum, kum sari touh na parei vaiteh, kum sari vai sari touh tie kum 49 akuep hnukkhu,

⁹ Tha sari, hnin 10, yonthanae hnin dawk mongka hah ram pueng dawk ueng sak han.

¹⁰ Aruipanganae kum hah thoung sak vaiteh, ram pueng dawk khoca pueng koe hloutnae pathang han. Jubili kum lah ao dawkvah tami pueng amae talai, amae phun koe a ban han.

¹¹ Hote aruipanganae kum teh Jubili kum lah ao dawkvah law na sak mahoeh. ama pouk kapâw e hai na a mahoeh. Rasoun hoeh e misur takha dawk e a paw hai na khi awh mahoeh.

¹² Jubili kum teh kathoungle kum lah ao dawkvah law dawk e apawhik dueng ca han.

¹³ Jubili kum nateh tami pueng ni amae khoram lah a ban awh han.

¹⁴ Nangmouh ni buet touh hoi buet touh yoranna na sak pawiteh buet touh hoi buet touh kâyue awh hanh.

¹⁵ Jubili kum aloum teh a ngai rae kumnaw apawhik a paw nahan a kum parei vaiteh yoranna na sak han.

¹⁶ Hottelah, a paw paw na kum parei hoi yo e lah ao dawkvah, kum ayoun apap e patetlah aphi payoun, paluen lahoi yoran han.

¹⁷ Nangmouh teh buet touh hoi buet touh kâyue awh hanh. Na Cathut taket awh. Kai teh nangmae BAWIPA Cathut lah ka o.

¹⁸ Nangmouh ni ka phunglam hah na tarawi pawiteh hote ram dawk lungmawng lahoi kho na sak awh han.

¹⁹ Talai ni hai apawhik a tâco sak vaiteh, kaboumlah na ca awh vaiteh, lungmawng lah kho na sak awh han.

²⁰ Nangmouh ni hai asari kum nah, kaimouh ni bangtelamaw ka ca awh han. Law ka sak awh hoeh. Apawhik hai ka pâkhueng awh hoeh na tet awh pawiteh,

²¹ A kum taruk nah, nangmouh yawhawinae na poe vaiteh, hote kum dawk kum thum touh hane apawhik ka tâco sak han.

²² nangmouh ni a kum taroe nah law na sak teh a kum tako nah apawhik pâkhuengnae totouh a karuem e apawhik na ca awh han.

Hnopai rungngangnae

²³ Talai hah ayâ pou tawn sak hanelah, yawt hanh. Talai teh Kaie doeh. Nangmouh teh Kai koe kârayen e imyin lah na o awh.

²⁴ Nangmouh ni talai na tawn a e hmuen pueng bout ratangnae kâ na poe awh han.

²⁵ Na hmaunawngghanaw ni roedeng boilah a tawn e talai yawt pawiteh, kahnai e hmaunawngna ni a yo e talai hah bout ratangnae kâ ao han.

²⁶ Hote talai hah ka ratang hane buet touh hai awm hoehpawiteh, ka tawn karuem ni ama ni bout ratang thai pawiteh,

²⁷ A yonae kum hah a touk vaiteh, aphi yit touh bout poe naseh. Hote talai teh bout a coe han.

²⁸ Bout poe thai hoehpawiteh, a yo e hno hah Jubili kum totouh ka ran e kut dawk ao sak han. Jubili kum nah tha pawiteh, hmaloe e katawnkung e kut dawk bout a pha han.

²⁹ Khopui dawk e im hah imkung ni yawt pawiteh, kum touh thung ratang thainae kâ ao sak han.

³⁰ Kum touh thung ratang thai hoehpawiteh, hote im ka ran e catounnaw ni pou a tawn han. Jubili kum ka phat nakunghai tha pouh mahoeħ toe.

³¹ Rapan ka tawn hoeh e kho dawk kaawm e im hah law patetlah a pouk vaiteh, ratang thainae kâ ao. Jubili kum pha toteh a tha pouh han.

³² Hat navah, Levihnaw ni a tawn e khopui hoi khopui dawk e imnaw teh nātuek hai thoseh, ratang thainae kâ ao.

³³ Levih ni a tawn e im hoi kho thoseh, ayâ ni ran pawiteh, Jubili kum a pha toteh a tha han. Bangkongtetpawiteh, Isarel miphun dawk Levihnaw teh ama onae kho hoi im hloilah alouke hno tawn hoeh.

³⁴ Hateiteh, Levih kho dawk kaawm e imlaw-naw yawt mahoeħ. Pou a tawn awh han.

³⁵ Nange na hmaunawngħa ni a roedeng lawi, imyin patetlah tho pawiteh, nang koe o sak hanlah na kabawp han.

³⁶ Ahni koe apung na cat mahoeħ. Na hmaunawngħa hah, nang koe o sak hanelah, na Cathut taket loe.

³⁷ Apung ngaihawi lahoi ahni koe tangka thoseh, canei thoseh na cawi mahoeħ.

³⁸ Kai ni Kanaan ram na poe awh teh, nangmae Cathut lah ka o nahanlah nangmouh Izip ram hoi na ka tâċawtkhai e nangmae BAWIPA Cathut doeħ.

³⁹ Na hmaunawngħa ni a roedeng dawkvah nang koe kâyawt pawiteh, san patetlah na hno

mahoeh.

⁴⁰ Ahni teh hlai e patetlah thoseh, imyin patetlah thoseh, nang koe ao vaiteh, Jubili kum totouh na thaw a tawk han.

⁴¹ Hat navah, ahni teh a canaw hoi a tâco vaiteh amae a hmaunawngħa, a mintoenaw e talai koe lah bout a ban han.

⁴² Bangkongtetpawiteh, ahnimouh teh Izip ram hoi ka tâcokhai e ka thaw ka tawk e lah ao dawkvah san lah o hanelah na yawt mahoeħ.

⁴³ Ahni teh puengħoi na rektap mahoeħ. Na Cathut hah taket.

⁴⁴ Nang ni na tawn hane sannu sanpa teh na tengpam kaawm e Jentelnaw koe na ran han.

⁴⁵ Hothloilah, nangmouh koe kho ka sak e alouk ram e taminaw thoseh, na ram dawk a khe e a canaw thoseh, na ran vaiteh na tawn han.

⁴⁶ Ahnimanaw teh san dawk hoi ka khe e lah ao teh, nang hoi na canaw ni râw lah na tawn han. Na hmaunawngħa, Isarel miphun dawk e tho pawiteh, buet touh hoi buet touh puengħoi na rektap mahoeħ.

Mathoe ratangnae

⁴⁷ Nangmouh koe kho ka sak e alouke tami ni a tawnta ei teh, ahnie teng kho ka sak e na hmaunawngħa a roedeng teh, nang koe kho ka sak e alouke ram e taminaw koe thoseh, a ca catounnaw koehai thoseh, kâyawt awħ pawiteh,

⁴⁸ Yo hnukkhu, bout ratang thainae kâ ao han. A hmaunawngħa lah kaawm e buetbuet touh ni a ratang han.

⁴⁹ A na hma, a panga, a hmaunawngħa koehoi rei ka tâcawt e imthung buetbuet touh ni a

ratang han. Ama ni ratang thai pawiteh a ratang han.

⁵⁰ Bawi hoi sannaw teh yorannae kum dawk hoi kamtawng vaiteh, Jubili kum totouh kum a parei hnukkhu, a kum ayoun apap e patetlah thoseh, a hlainae tueng khet lahoi thoseh, aphiuh teh to han.

⁵¹ Jubili kum a pha hoehnahlan a thawtawknae kum ayoun apap e parei vaiteh,

⁵² A ngai rae a kumtha ayoun apap e patetlah ratang nahane aphiuh hah rannae phu dawk hoi rayu vaiteh bout a pâban han.

⁵³ Ahni teh kum touh hnukkhu, kum touh hlai e patetlah ao han. Na hmaitung vah rektap lah awm hanh naseh.

⁵⁴ Hottelah hoi ratang thai hoehpawiteh, Jubili kum a pha toteh, ahni teh a canaw hoi bawi e kut dawk hoi a hlout han.

⁵⁵ Bangkongtetpawiteh, Isarelnaw teh ka thaw ka tawk e lah ao awh. Izip ram hoi ka tâcokhai e ka thaw ka tawk e lah ao awh. Kai teh nangmae BAWIPA Cathut doeht.

26

Lawkgainae dawk yawhawinae

¹ BAWIPA ni bawk hanlah kutsak thoseh, talung ung e thoseh, meilam thuk e talung thoseh, na sak awh mahoe. Kai teh nangmae BAWIPA Cathut doeht.

² Kaie Sabbath hah na ya awh vaiteh ka hmuen kathoung na bari awh han. Kai teh BAWIPA doeht.

³ Kaie phunglawknaw hoi kâpoelawknaw hah na tarawi pawiteh,

⁴ Ama tue nah kho ka rak sak han, talai ni apawhik a tâco sak vaiteh takha thung e thingthainaw ni a paw awh han.

⁵ Canganae teh misur paw khinae tueng totouh thoseh, misur paw khinae teh law tunae tueng totouh thoseh, a pha vaiteh, nangmouh ni kaboumlah na ca awh vaiteh, na ram dawk lungmawngcalah kho na sak awh han.

⁶ Na ram dawk taran karoum sak vaiteh, katarengkung awm laipalah ihmutui lah na i awh han. Sarangnaw hah na ram dawk hoi ka pâlei vaiteh na ram pueng ni tahloi duenae dawk hoi a hlout awh han.

⁷ Nangmouh ni na tarannaw na pâlei awh vaiteh, tahloi hoi na thei awh han.

⁸ Nangmouh thung dawk tami panga touh ni taran 100 touh na pâlei awh han. Tami 100 touh ni taran thong hra, touh na pâlei awh vaiteh, tahloi hoi na tâ awh han.

⁹ Yawhawinae na poe awh vaiteh na pungdaw awh han. Nangmouh hoi lawkkam ka sak e pou ka caksak han.

¹⁰ Na pâtung e caruem abaw hoehnahlan, catha bout ao toungh dawkvah caruem teh na pahoung awh han.

¹¹ Kai ni panuet laipalah nangmouh koe lukkareiim ka o sak han.

¹² Nangmouh koe ka o vaiteh nangmae Cathut lah ka o han. Nangmouh hai ka tami lah na o awh han.

¹³ Izip ram dawk san na tang awh hoeh nahanelah, Kai na BAWIPA Cathut ni na tâcokhai awh toe. Na kahnamrui ka a teh, kalan lah na ceisak toe.

Lawkngaihoeh dawk reknae

¹⁴ Hateiteh, nangmouh ni ka lawk na ngai awh hoeh, kâpoelawlk abuemlah na tarawi awh hoeh,

¹⁵ Ka phunglawknaw na panuet awh teh, banglahai noutna laipalah kâpoelawlk na tarawi awh hoeh, lawkkam na raphoe awh pawiteh,

¹⁶ Nangmouh koe ka sak hane hnonaw teh, mit ronae, lungpuennae, kaluekalapnae, kahawi thai hoeh e patawnae hoi patawnae aphunphun ka pha sak han. Cati na kahei eiteh, aphi awm hoeh. Tarannaw ni a ca awh han.

¹⁷ Nangmouh na pahnawt awh vaiteh taran hmalah na sung sak awh han. Nangmanaw teh tarannaw ni na uk awh vaiteh apini na ka pálei hoeh nakunghai na yawng awh han.

¹⁸ Hottelah na khang a eiteh, ka lawk bout na ngai awh hoehpawiteh, namae yon dawk let sari totouh na rek awh han rah.

¹⁹ Nangmae kâoupnae hah ka khoe han, kalvan hah sum patetlah thoseh, talai hah rahum patetlah thoseh, ka sak vaiteh,

²⁰ Nangmanaw teh ayawmyin lah tha na patho awh han. Na talai ni rawca tâcawt sak mahoe. Takha dawk e thingthainaw ni paw mahoe.

²¹ Nangmouh ni ka lawk na ngai awh hoeh, Kai na taran awh pawiteh, na yonnae patetlah let sari touh e runae ka pha sak han.

²² Nangmouh koe sarang katha vaiteh, na canaw a rakoung awh han, na saringnaw kei awh vaiteh, tami hoe na youn awh han, na lamthung hai kingdi han.

²³ Hottelah, na khang a nakunghai, na ka panuek awh hoeh lah, Kai bout na taran awh pawiteh,

²⁴ Kai ni hai na taran awh vaiteh na yonnae kecu dawk let sari touh e runae hoi na rektap awh han.

²⁵ Ka lawkkam na tapoe dawkvah lawkceng-nae talai nangmouh lathueng ka pha sak han. Nangmouh ni kho dawk na kamkhueng awh navah, lacik ka pha sak vaiteh, taran kut dawk na poe awh han.

²⁶ Nangmae rawca hah ka takhoe toteh, napui hra touh ni nangmae vaiyei hah takhuen buet touh dawk a pâeng hnukkhu, hote vaiyei hah a khing pouh teh nangmouh ni na boum awh mahoeh.

²⁷ Hathnukkhu haiyah, ka lawk na ngai awh hoeh lah, Kai paroup na taran awh pawiteh,

²⁸ Kai hai ka lungkhuek vaiteh, na taran awh han. Na yon kecu dawk alet sari touh na rek awh han.

²⁹ Nangmouh ni na canaw e a moi na ca awh han.

³⁰ Na hmuen karasangnaw hah ka raphoe vaiteh, kutsak cathutnaw hah koung ka rawp sak han. Na ronaw hah hringnae ka tawn hoeh e kutsak cathut van vah, ka tâkhawng vaiteh na panuet awh han.

³¹ Nangmae khopuinaw ka raphoe hoi hmuen kathoung ka raphoe vaiteh nangmae hmuitinaw ka pahnuem mahoeh.

³² Na ram pueng Kai ni ka raphoe e hah hote ram dawk kaawm e na tarannaw ni a hmu

navah, kângairu awh han.

³³ Alouke miphunnaw koe na kampek sak awh vaiteh, tahloi hoi na pâlei awh han. Na khopui a rawk vaiteh na ram a kingdi han.

³⁴ Hottelah, nangmanaw teh na tarannaw e ram dawk na o awh vaiteh, na ram teh tami kingdi lah onae tueng pueng dawk, na ram kingdi vaiteh, Sabbath hninnaw dawk na nawm awh han.

³⁵ Nangmouh na o nateh, Sabbath hninnaw dawkvah na ram teh kâhat mahoeh. Tami kingdi lah onae tueng dawk na ram teh kâhat lah ao han.

³⁶ Taran ram dawk kaawm rae nangmae lungthin thung kaluenae ka pakhum vaiteh, thinghna kâhuet pawlawk dawk na taki vaiteh, taran kut dawk hoi na yawng e patetlah na yawng awh han. Apinihai pâlei hoeh nakunghai a rawp han.

³⁷ Apinihai pâlei hoeh eiteh taran kut dawk hoi ka yawng e patetlah buet touh van buet touh a rawp awh han. Taran hmalah kangdue thainae tawn mahoeh.

³⁸ Na tarannaw e ram ni na payawp awh vaiteh Jentelnaw koe na sung awh han.

³⁹ Kacawirae nangmouh ni taran ram dawk nangmae yon hoi mintoenaw e yon hah na khang awh vaiteh, mintoenaw hoi cungtalah na kahma awh han.

⁴⁰ Hateiteh, ahnimouh ni kai koe a yon awh teh, Kai na taran awh dawkvah,

⁴¹ Kai ni ahnimanaw ka taran vaiteh, a tarannaw e ram dawk ka thak han. Ma e yon,

mintoenaw e yon hah pâpho laihoi kâhet awh pawiteh, vuensom ka a hoeh e amamae lungthin hah kârahnoum awh teh, amamae yon dawk reknae khang awh pawiteh,

⁴² Kai ni Jakop, Isak, Abraham tinaw hoi ka sak e lawkkam thoseh, hote ram thoseh pahnim mahoeh.

⁴³ Hote ram teh ahnimae kut dawk hoi a hlout vaiteh, ahnimouh awm laipalah kingdi lah ao navah, amae Sabbath hninnaw dawk a nawm awh han. Ahnimouh ni ka phunglam a panuet awh teh, banglahai noutna hoeh lah a sak e yon kecu dawk reknae a khang awh han.

⁴⁴ Hottelal tarannaw dawk ao awh navah, ahnimanaaw ka raphoe vaiteh, ahnimouh hoi lawkkam e raphoe totouh, ahnimanaaw Kai ni ka maithoe mahoeh. Ka pahnawt mahoeh. Kai teh ahnimae BAWIPA Cathut doeh.

⁴⁵ Kai teh ahnimae Cathut lah ka o nahanelah Jentelnaw hmalah Izip ram hoi ka tâcokhai e ahnimae mintoenaw hoi ka sak e lawkkam hah, ahnimouh hanlah ka pahnim mahoeh. Kai teh BAWIPA doeh telah a ti.

⁴⁶ Hote phunglawk hoi kâlawknaw hah Sinai mon dawk BAWIPA ni Isarelnaw hanlah Mosi koe a poe e doeh.

27

Lawkkam e phung

¹ Cathut ni Mosi koe, nang ni Isarelnaw koe patuen na dei pouh hane teh,

² Tami ni lawkkam e patetlah BAWIPA koe poe pawiteh, ka poe hane kawi naw, nang ni aphu

tâtueng tangcoung e patetlah Cathut e hno lah ao han.

³ Nang ni bangtelamaw aphi na tâtueng han tetpawiteh, tongpa a kum 20 hoi 60 totouh e teh ngun tangka 50 touh lah aphi na tâtueng han.

⁴ Napui teh ngun tangka 30 touh lah aphi na tâtueng han.

⁵ Kum panga koehoi kum 20 totouh e tongpa teh ngun tangka 20, napui teh ngun tangka phek hra touh lah aphi na tâtueng han.

⁶ Kum panga a rahim e tongpa teh ngun tangka phek panga, napui teh phek thum touh lah aphi na tâtueng han.

⁷ Kumrui taruk lathueng e tongpa teh ngun tangka hlaipanga, napui teh phek hra touh lah aphi na tâtueng han.

⁸ Nang ni aphi na tâtueng e patetlah poe thai hoehpawiteh, vaihma koe a cei vaiteh, vaihma ni lawkkam ka sak e tami ni a poe thai e patetlah aphi a tâtueng pouh awh han.

⁹ Tami ni Cathut koe saring poe pawiteh, a poe e pueng teh a thoung han.

¹⁰ Kahawi thoseh, kahawihoehe thoseh, buet touh hoi buet touh na thung awh mahoe. Thung han na ngai awh pawiteh, kahni touh hoi roi a thoung han.

¹¹ Cathut koe poe kawi hoeh e kathounghoehe saring lah awm pawiteh vaihma koe patue vaiteh,

¹² Ahawi hoi hawihoeh e patetlah vaihma ni aphi a tâtueng han. Vaihma ni a tâtueng e patetlah aphi teh ao han.

¹³ Kapoekung ni ratang hanlah ngai pawiteh, saring phu hoi pung panga touh dawk pung touh bout a poe sin han.

¹⁴ Tami ni BAWIPA hanlah a im poe pawiteh, im ahawi hoi hawihoeh e vahima ni a khet vaiteh aphi a tātueng han. Vahima ni aphi a tātueng e patetlah aphi teh ao han.

¹⁵ Im kapoekung ni bout ratang hanlah ngai pawiteh, im phu hoi pung panga touh dawk pung touh bout a poe sin han.

¹⁶ Tami ni a lawhmuen hah BAWIPA hanlah poe pawiteh, Cati patue e patetlah aphi teh a tātueng han. Cati hmuen touh patue e law hah ngun tangka 50 touh lah aphi tātueng han.

¹⁷ Jubili kum kamtawng nah a law hah poe pawiteh aphi teh a tātueng yit touh a poe han.

¹⁸ Jubili kum abaw hnukkhu law hah poe pawiteh, hmalae Jubili kum totouh e a ngai rae kumnaw hah vahima ni a parei vaiteh, a tātueng e law phu teh a payoun pouh han.

¹⁹ Law kapoekung ni bout ratang hanlah ngai pawiteh, a law phu hoi pung panga pung touh bout a poe sin han.

²⁰ Ratang thai hoeh lah alouke tami koe yawt pawiteh, bout ratang han lawi naseh.

²¹ Jubili kum akuep toteh, hote law teh BAWIPA e lah ao vaiteh vahmanaw ni a pang han.

²² Tami ni a ran e law hah BAWIPA hanlah poe pawiteh,

²³ Jubili kum totouh hane aphi tātueng e hah vahima ni a kum a parei vaiteh, aphi a tātueng e patetlah hote tami ni hote hnin dawk a poe han. Hote teh BAWIPA e doeht.

²⁴ Jubili kum a pha toteh, hote law hah ahmaloe ka tawn ni teh kayawtkung koe bout a poe han.

²⁵ Aphi tātueng e pueng dawk ngun tangka lahoi na tātueng han. Ngun tangka phek touh e teh gerah 20 touh hoi a kāvan.

²⁶ BAWIPA e lah kaawm e saring camin pueng teh, apinihai ama hanlah lat mahoeh. Bangkongtetpawiteh, camin teh BAWIPA e doeh. Maito, tu hoi hmaecanaw teh BAWIPA e lah doeh ao.

²⁷ Kathounghoehe saring lah awm pawiteh, aphi tātueng e patetlah a ratang vaiteh pung panga touh dawk pung touh bout a poe sin han. Ratang ngai hoepawiteh, aphi tātueng e patetlah a yo han.

²⁸ Hateiteh, tami thoseh, saring thoseh, mae law thoseh, Cathut koe thoebo laihoi poe e pueng teh, apinihai bout ratang bout yawt nahanh lawi naseh. Thoebo laihoi poe e pueng teh Cathut hanlah kathounge lah ao.

²⁹ Tami patenghai thoebo laihoi na poe pawiteh, bout na ratang mahoeh, na thei han.

³⁰ Cakang thoseh, apawhik thoseh, talai dawk hoi ka tācawt e apawhik pueng hra touh dawk buet touh e teh BAWIPA e hno doeh. BAWIPA hanelah kathounge lah ao.

³¹ Hra touh dawk buet touh e hah ratang hanelah na ngai pawiteh, Aphi hoi pung panga touh dawk pung touh bout na poe sin han.

³² Maito thoseh, tu hoi hmae thoseh, sonron rahim vah kāen e ahranae pueng teh BAWIPA hanelah kathounge lah ao han.

³³ Ahawi hoi hawihoeħ e na khen awh mahoeħ. Buet touħ hoi buet touħ na thung awh mahoeħ. Thung han na ngai awh pawiteħ, kahni touħ hoi rei a thoung han. Bout na ratang mahoeħ telah na dei pouħ han.

³⁴ Hete kāpoelawknaw teh Cathut ni Sinai mon dawk Isarelnaw hanlah Mosi koe kâ a poe e naw doeħ.

**Thai Phum Holy Bible
The Holy Bible in the Thaiphum Chin language of
Myanmar**

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-01

PDF generated using Haiola and XeLaTeX on 15 May 2025 from source files dated 15 May 2025

84c7fe95-3b68-5ab6-b17e-a642d33ac078